

ASO LULU, 22 APERILA 2015

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: Ou te faasilasila atu ua toe amataina nei Taulumaga a le Fono Aoaofa Faitulafono.

“TUSI FAAMAONIA O LE FILIFILIA

INA IA TUSA AI ma aiaiga o le Vaega 80 o le Tulafono o Faiga Palota 1963, faapea le Mataupu 24b o le Faavae **O A’U, TUI ATUA TUPUA TAMASESE EFI, AO O LE MALO,** ua ou tuuina atu nei le Tusi Faamaonia o le Filifilia o le ua taua i lalo ua filifilia e avea ma Sui Usufono o le Palemene o le Itumalo Faaalaalafaga o Sagaga le Usoga.

Sui Tauva:

Susuga SEIULI, Ueligitone Seiuli.

Tuuina atu i loʻu nei Lima i le Aso Gafua, aso 20 o Aperila 2015.

(Sainia): **Tui Atua Tupua Tamasese Efi**
AO O LE MALO.”

FOFOGA FETALAI: A o le i afio mai le sui usufono fou i luma o le Laulau mo le Tautoga, ou te valaau atu i le sui usufono ina ia tulai i luga a o ou faitauina le Tulafono Taualoa Faapalemene.

Tulai le sui usufono mo Sagaga le Usoga.

TULAFONO O AMIO TAUALOA FAAPALEMENE.

FAAMATALAGA MA FAAMOEMOEGA.

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga taualoa, e puipuia ai ma faatumauiina ai le mamalu o le Palemene ma faia ai taumafaiga uma e faatumauiina ai aiaiga autu o le Faavae.

22 *APERILA 2015***Tusi Faamaonia o le Filifilia**

O aiaiga autu ua taua ma faamoemoega e tuuina atu ai ni taiala ma ni tulaga i Sui Usufono taitasi o le Palemene, e tatau ona faatinoina o outou tiute ma matafaioi i se tulaga tutoatasi po o le aotelega.

O AIAIGA AUTU.

- (1) Faamaoni i le atunuu ma ona tagata.
O Sui Usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa, o ana faalapotopotoga ma ona tagata,
- (2) Faaaloalo i Tulafono.
E tatau i le Sui Usufono ona tausisia tulafono a Samoa ma puipuia aiaiga autu o lo o i totonu o le Faavae.
- (3) Faaaloalo i Tagata uma.
E tatau i le Sui Usufono uma ona faaaloalo i le isi Sui Usufono, tagata lautele ma ofisa maufofi o le Malo faapea foi ma galuega tulaga mamalu, faamaoni, ma le I faaituau aemaise le amiotonu i taimi uma.
- (4) Faatinoga Lelei o Pule.
E tatau i le Sui Usufono uma ona:
 - (a) Faatulaga a latou mataupu totino;
 - (b) Faaaoga so o se faamatalaga ma faamatalaga uma e maua mai i o latou tofi faale-malo; ma
 - (c) Faatinoga o le malosia po o pule na maua i o latou tofi faale-malo, mo na o le lelei o tagata lautele ma pe afai ua tuuina mai i so o se tulaga talafeagai ma se tulaga moni e feteenai ai aia, pei o tulaga tau tupe a le Sui Usufono lava ia, faaletulafono po o se aia a le Sui Usufono e tatau ona faamaonia ma faasilasilaina atu ma le faia o so o se laasaga e aveese ai sea feteenaiga mai le uluai taimi o le fetuunaiga tau pisinisi.

Manaoga Faapitoa mo Minisita ma Isi Tagata o lo o Umia Tofi Faale-Malo.

O le Sui Usufono uma o lo o umia tofi faapalemene o so o se ituaiga ua manaomia e usitaia atoatoa aiaiga autu e pei ona faamatalaina i luga ma o le a tatau i lalo o so o se ituaiga ma so o se tulaga ona faia o so o se faaiuga o le a tuuina atu o le malosia o so o se ituaiga, po o le a lava, e tusa ai ma le mataupu o le a maua mai le Sui Usufono o so o se faaopoopoga o ana meatotino po o faamanuiaga.

22 APERILA 2015

Faatautoina o le Sui Usufono fou

FAASALAGA.

O le solia o leni tulafono laititi o le a ono tagofia e le Komiti o Tulaga Aloaia ma Amio Taualoa e pei ona o le a fuafuaina e le Palemene.ö

Na fofogaina e le Fofoga Fetalai Tulafono Laititi o Amio Taualoa Faapalemene a o tulai le sui usufono fou.

FOFOGA FETALAI: Ou te valaau atu i le sui usufono mamalu e afio mai i luma nei mo le Faatautoga.

Tuu lou aao taumatau i luga o le Tusi Paia ma e faataitai mai i le Tautoga o le a ou faitauina atu. A oo atu i le taimi e tau ai lou suafa, ona e tau lea e oe o lou suafa.

FAATAUTOINA O LE SUI USUFONO FOU

O le sui usufono fou na faia lana Tautoga o le Loto Faamaoni.

1. SEIULI Ueligitone Seiuli.

O A'U oou te tauto i le Atua e Ona le Malosi uma lava, o le a ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a ou faataunuaina ma le tatau ai ma le faamaoni ou tiute e avea ai o se sui usufono o le Palemene o Samoa. Ia fesoasoani mai le Atua ia te aö.

FOFOGA FETALAI: Ou te talosaga atu i le tatou Palemene e aumai se tatou patipati tele tatou faafeiloai le Afioga i le sui usufono fou.

Na faaalua le fiafia o sui usufono o le Palemene i le patipati o latou aao e faafeiloai ai le sui usufono fou ua filifilia.

FOFOGA FETALAI: I lou agaga faaaloalo tele, ou te faatalofa atu ai i le paia ma le mamalu maualuga o le tatou Maota i leni taeao. I le alafai mai i faguga lelei le paia maualuga o le tatou Palemene i ona tulaga faalupelupe le afio o lau Afioga i le Taitai o le Malo ma lau Kapeneta mamalu, afio foi le Afioga i le Taitai o le Itu Agai ma sui usufono mamalu o le tatou Maota Fono i leni taeao.

E manatu foi o lea ua malu mauga le paia o Samoa ua potopoto, o paia i tupu ma ee o tamalii ma failauga, faletua ma tausii, saoa ma tamaitai e oo i a tatou fanau pele, aemaise foi le paia maualuga o Faaluuluga o Matagaluega aemaise i Faalapopotoga a le Malo ua tatou mafuta i leni aso.

Faatautoina o le Sui Usufono fou

E manatu e tele taeao e le lau taeao ae tautalaaso le aso, ua tatou faatasi ona o lenei sauniga faapitoa o le tatou faautoga aloaia ma o tatou faafeiloai le Afioga ia Seiuli Ueligitone Seiuli, ia ona o le faiga filifiliga a le itumalo o Sagaga le Usoga. E talitonu foi le faamoemoe ua tatou taunuu ona o le filifiliga aloaia a le itumalo i ona tulaga faalupe, o le paia lava lea aua le afio o Saena ma le Aiga Sa Saena, afio Alo o Fuatino, afio Tuifea Ututaaloga ma Vaoga, alaatai Tupaiolefale ma le Afu o le Alataua. Afifio foi le paia o le Aiga Sagaulefaleai, afifio mai oulua Olotua Alaalatama o Savea ma Ututaaloga, faapea le Matua. Susu ia oulua toalua ia Fata ma Maulolo, vaeane le vagana le tulafale, ia ma le susuga ia Tuisamau. O lea foi e alaatai le susu o le Susuga i le Tapaau Faasisina le Susuga i le Malietoa na faafofoga i ai Samoa, mamalu Maualaivao ma le Aiga Sa Maualaivao, Matua ia Faamausili, Susu Taito o le Fuaalii aemaise o le susu i le Susuga ia Seiuli, malii mai Pou e Fitu o le Fale Malietoa ia ma upu ia te oe le Auimatagi.

O ou paia popo na ma ou pa le solo aua lenei taeao fou ma le afifio mai ma le tala mai aao i le paia o aiga alii i tuua ma matua o le Afioga i le sui usufono, ia afio maia ma tala mai aao i lenei aso. E momoli atu le faafetai tele a le Palemene, aua o le tofa e le soona tatala, o le fue e le soona sausau aua sa fili se mago, fili se agavaa, aua se tautai matapalapala e tauaveina le nofoa o le itumalo. O le agaga faafetai e le faagaloina tae o i Atua i le sa seei i le nofoa, le Afioga ia Muagututagata Peter Ah Him, ia e le toe tauasaina le ogasami ua uma ona asa ona o tulaga i lona finagalo e faamuli ese ma le tofi, a o lea ua toe soo fau le fau ma le fau i lenei taeao, ua tatou fesilafai ma le Afioga ia Seiuli. Ia Seiuli, welcome to our family, afio maia ma tala mai aao i lenei taeao, o lou Palemene lenei, o lou aiga lenei, ua mavae atuvasa o fefuliaiga, o lou taunuu mai ae toe o se aga tini le faamoemoe mo le Palota, e te le masalosalo leaga o tofiga nei o tofiga mai le Atua, o tatou manatu e le o le finagalo lea o le Atua, ae ia e talitonu i lou valaauina. I lenei aso o lena ua e alaala i totonu o saofaiga o lupe na faia mai i le fuifui o manu, ua o tatou pale mai i salafa talu le filifiliga a Samoa. Ia e matou te ofo alofa atu ma faamanuia atu i tulaga aloaia. O tulaga Faapalemene o le Fofoga Fetalai, o lena ua tuu atu lau Tusi Paia atoa lena e te faitau atoa ae le i uma le Paeiga. Sa faapena foi le filifiliga o sui usufono mamalu uma o i ai nei, masalo e i ai lava nisi e le i uma le faitauina o le Tusi Paia a o lea o le a latalata maea le Paeiga. O ou mama na, ia maua lau tofa ma lau faautautaga e tauave ai tiute faale-Itumalo, ae tatalo i le Atua e fesoasoani i le vaivai ma le faatauvaa, e talitonu le faamoemoe e leai se mea e faigata i le Atua.

O le a tatou alo i le tatou galuega ma le talitonuga o le a au le Atua ma la tatou faatasiga i lenei aso. Ia lagi maina le afifio ma tala mai o aao o le paia o le Itumalo aemaise aiga, tatou tau fai tatalo i le Atua ina ia taitai lo outou soifua manuia aua le feagai ai i feau ma tiute o lenei aso.

22 *APERILA 2015***TUUINA ATU O PEPA**

Na tolaulauina e le Failautusi le Pepa ua faataatia i luga o le Laulau a Fono e tusa ai ma le T.T.48.

1. P.P. 2014/2015 Nu. 245, Lipoti Faaletausaga a le Pulega o le Suavai mo le 2013-2014.

TUUINA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T.51.

1. P.P. 2014/2015 Nu. 246, Lipoti a le Komiti o le Soifua Maloloina i le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015.
2. P.P. 2014/2015 Nu. 247, Lipoti a le Komiti o le Soifua Maloloina i le P.P. 2014/2015 Nu. 128, Lipoti Faaletausaga a le Matagaluega o le Soifua Maloloina mo le Tausaga 2012/2013.
3. P.P. 2014/2015 Nu. 248, Lipoti a le Komiti o Oloa Gaosia tulaga Muamua i le P.P. 2014/2015 Nu. 3 & P.P. 2014/2015 Nu. 180, Lipoti Faaletausaga a le Faletupe o Atiina Ae o Samoa mo le tausaga 2013 ma le 2014.
4. P.P. 2014/2015 Nu. 249, Lipoti a le Komiti o Mataupu tau Faamasinoga i le P.P. 2014/2015 Nu. 93, Lipoti a le Komisi o le Toefuataiga o Tulafono a Samoa i le Tulafono o Falepuipui 1967, Lipoti 04/11.
5. P.P. 2014/2015 Nu. 250, Lipoti a le Komiti o Mataupu tau Faamasinoga i le P.P. 2014/2015 Nu. 121, Lipoti a le Komisi o le Toefuataiga o Tulafono a Samoa i le Tulafono o Taulumaga tau Soligatulafono 1972, Lipoti 07/12.
6. P.P. 2014/2015 Nu. 251, Lipoti a le Komiti o Galuega,, Felauaiga ma Siosiomaga i le P.P. 2014/2015 Nu. 81, 82, 83, 84 & 85, Lipoti Faaletausaga a le Faalapotopotoga o Eleele Tumaoti a le Malo mo tausaga 2006, 2007, 2008, 2009 & 2010-2012.
7. P.P. 2014/2015 Nu. 252, Lipoti a le Komiti o Galuega, Felauaiga ma Siosiomaga i le P.P. 2014/2015 Nu. 147, 148 & 149, Lipoti Faaletausaga a le Pulega o Felauaiga i le Laueele mo tausaga 2011, 2013 & 2013.
8. P.P. 2014/2015 Nu. 253, Lipoti a le Komiti a le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2014/2015 Nu. 40 & P.P. 2014/2015 Nu. 41, Lipoti Faaletausaga a le Faalapotopotoga o Mea Tau Fale a Samoa mo Tausaga Faaletupe 2012 & 2013.

22 *APERILA 2015*

Lafo a le Komiti o Galuega, Tulafono Tumau, Maota Fono ma Mataupu Tau Faigapalota

9. P.P. 2014/2015 Nu. 254, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le P.P. 2014/2015 Nu. 9, Lipoti Faaletausaga a le Faalapotopotoga Faavae tau Fatugao a Samoa mo le tausaga faaletupe 2011-2012.
10. P.P. 2014/2015 Nu. 255, Lipoti a le Komiti o Galuega, Felauaiga ma Siosiomaga i le P.P. 2014/2015 Nu. 122, Faamatalaga o Sini Autu a le Pulega o le Suavai mo le vaitaimi 2015-2017.
11. P.P. 2014/2015 Nu. 256, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2014/2015 Nu. 195, Lipoti Faaletausaga a le Matagaluega o Pisinisi, Alamanuia ma Leipa mo le tausaga 2012-2013.
12. P.P. 2014/2015 Nu. 257, Lipoti a le Komiti o Galuega, Felauaiga ma Siosiomaga i le P.P. 2014/2015 Nu. 95, Lipoti Faaletausaga Lona 50 a le Esetete Tausi a Samoa mo le tausaga 2012.
13. P.P. 2014/2015 Nu. 258, Lipoti a le Komiti o Galuega, Felauaiga ma Siosiomaga i le P.P. 2014/2015 Nu. 17, Lipoti Faaletausaga a le Faalapotopotoga o le Malosi Faa-Eletise mo le tausaga 2013.

LAFO A LE KOMITI O GALUEGA, TULAFONO TUMAU, MAOTA FONOMA MATAUPU TAU FAIGA PALOTA

Tofa AGAFILI PATISELA ETEUATI TOLOVAA (Sui Taitaifono Komiti o Galuega, Tulafono Tumau, Maota Fono ma Mataupu tau Faiga Palota): Faafetai tele mo lou avanoa i lau Afioga i le Fofoga Fetalai. O lea ua e muai sii le faafetai i le Atua i lenei taeao e viia ai Lona agalelei, ou te talitonu o le a lava lea mo le tatou faafetai. Ua e toe faapai foi i le Itumalo e pei ona tatou tauaofia i lenei taeao o le a auai foi le Sui Fofoga Fetalai. Ua e faamanuia foi i le sui usufono ua tusi aao i ai le Itumalo, o le agaga foi lea o le Sui Fofoga Fetalai.

Ua ou tulai atu e faatu le lafo, *Ina ia faamaonia e lenei Fono Aoa le Filifiliga o le Susuga Seiuli Ueligitone Seiuli, e avea ma sui usufono o Komiti Filifilia nei:*

- (i). *Komiti mo Ofisa o le Palemene.*
- (ii). *Komiti o Faafoega Tau Pulega a le Malo.*

Ma lou faaaloalo lava.

Faaluaina e se tasi o sui usufono o le Palota Taitoatasi, Susuga Hon Papaliitele Niko Lee Hang, se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow, sui usufono mo Aleipata Itupa i Lalo ma se tasi o sui usufono o le Palota Taitoatasi, Afioga Maualaivao Pat Ah Him.

22 APERILA 2015

**Tulafono Tau Faaofi o Taumafa 2013
- iloiloga auiliili**

Na faamaonia le lafo ma faamaonia ai e le Fono Aoa le filifilia o le sui usufono mo Komiti Filifilia a le Palemene e pei ona faatulagaina i le lafo.

FOFOGA FETALAI: O le a i ai se taimi mulimuli ane ona maua lea o se feiloaiga ma lau Afioga i le sui usufono, ona faamalamalama uma atu lea e le Failautusi tulaga o Komiti e pei ona faatuina ai le lafo i le aso ma pasia aloaia ai Komiti faa-Palemene o le a e galue ai.

Na toe faaauau felafolafaiga i luga o le iloiloga auiliili o le Tulafono Tau Faaofi o Taumafa 2013.

**TULAFONO TAU FAAOFI O TAUMAFI 2013
– iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le iloiloga auiliili.

Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW (Taitaifono Komiti o le Soifua Maloloina, Galuega tau le Va Fealoai, Mataupu Tau Lotoifale ma Atinae o Afioga ma Agafesootai): Lau Afioga i le Fofoga Fetalai, ae ou te le i faatuina le lafo, e ao ona ou avatu muamua le faafetai i le agaga o le faafetai e pei ona e siitia i leni taeao ma valaauina ai le afio mai o le Agaga o le Atua ina ia tatou galulue faatasi. E le gata i lena e faafeiloai atu ai foi i le sui usufono fou mo Sagaga le Usoga, Susuga Seiuli Ueligitone Seiuli, malo lava le tau, faafetai ua tatou feiloai ma le manuia.

Lau Afioga i le Fofoga Fetalai ou te faatu le lafo, *Ina ia faamaonia e leni Fono Aoa le Lipoti a le Komiti o lo o fautuina ai, ina ia faagasolo le Tulafono Tau Faaofi o Taumafa 2013 faatasi ma Teuteuga ma Faasaoga.*

Faafetai.

Faaluaina e le Sui Fofoga Fetalai, se tasi o sui usufono mo le Palota Taitoatasi ma le sui usufono mo Aleipata Itupa i Lalo.

Na faamaonia le Lipoti.

FOFOGA FETALAI: O le a sagai atu loa le Fono Aoa mo le iloiloina o le Tulafono Tau Faaofi o Taumafa 2013. E tusa ai ma le Tulafono Tumau 102, e amata le iloiloina o le Tulafono Tau Faaofi i lona Fuaiupu 2.

22 APERILA 2015

**Tulafono Tau Faaofi o Taumafa 2013
- iloiloga auilili**

FUAIUPU 2: Faamatalaina o uiga o upu.

Faamaonia.

FUAIUPU 3: Faamoemoega.

Faamaonia.

FUAIUPU 4: Sootaga ma isi Tulafono.

Faamaonia.

FUAIUPU 5: Taumafa e saogalemu.

Faamaonia.

FUAIUPU 6: Taumafa talafeagai.

FOFOGA FETALAI: O lo o i ai le Teuteuga a le Komiti i le Fuaiupu 6(2) e pei ona faaalia i le Pepa Faaopoopo o Galuega. Tulai mai le Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Teuteuga i le fuaiupu 6(2) e faapea:-

ØTEUTEUGA:

Ia aveese le fuainumera “800” ma suia i le fuainumera “10,000”, ma ia aveese le fuainumera “tolu(3)” ma suia i le fuainumera “lima (5)” ia o lo o aliae mai i le tuanai ai o upu “e le silia le” ma faitauina ai le (2) e faapea:-

“(2) O se tagata, o ia lea ua na solia le faafuaiupu (1), ua na faia se soligatulafono ma e noatia i luga o se moliaga ua faamaonia faaletulafono i se sala tupe e le silia le 10,000 iunite tau faasalaga po o le nofosala i le falepuipui mo se vaiaimi e le silia le lima (5) tausaga, po o ia faasalaga uma e lua.”

22 *APERILA 2015*

**Tulafono Tau Faaofi o Taumafa 2013
- iloiloga auiliili**

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Lau Afioga i le Fofoga Fetalai, e fia fai se manatu i le vaega lenei o le Tulafono Tau Faaofi. A o le i fai atua se manatu e ao lava ona avatu pea se faamanuiaga a lenei Itumalo i le sui usufono mo Sagaga le Usoga i lou tulai mai, ia manuia tele lou tulai mai. Amuia oe, o lea o le a uma a matou lima tausaga a o lena faatoa amata lau lima tausaga. E le o oe o se tagata ese a o le Palemene e le faia i se tino ae fai i le lelei o le leo, a faafofoga mai le itumalo o leoleoa atu i inei e te toe sau foi i lea tausaga.

E fia momoli foi lau faafetai i le Minisita mo le Soifua Maloloina o lea faatoa taliu mai Fiti i lo latou Faailoga Taualoa, o a latou fuafuaga tuutuu mamao leaga o le Minisita e mataala, ioe, ua tele faailoga ua maua e lenei Minisita e uma atu lenei Paeaiga ae toe sau foi i le tele o ona faailoga.

Lau Afioga i le Taitaifono o le Komiti, muamua lava o le tatou Tulafono Tau Faaofi lenei na talanoaina i le aso 8 Oketopa 2013 a o lenei faatoa toe oo mai i lenei masina. O le fesili muamua lau Afioga, po o le a tonu le mafuaaga ua tuai mai ai, ua leai ni a matou kopi ao le mataupu lea ua aumai nei e lau Afioga i le fesuiaga o fuainumera, talu ona ou i inei i le Palemene o Samoa ma Tulafono ua aumai faatoa ou vaai lea i ni faasalaga maoae faapenei, ua oo i le tai 10,000 iunite ae a faaliliu i tupe e \$100,000. Ua muliga le faasalaga o se tagata ua faisoti tagata po o se ituaiga mea faapena, se i tagai lau Afioga pe aisea lava ua soona maemaea ai nei ituaiga faasalaga tetele faapenei? Its unrealistic sa tatou talanoaina ananafi le Tulafono a le SIFA e gata i le tai \$10,000 a o kamupani tetele mai fafo a o lea ua oo i le 10,000 iunite a faatusatusa i tupe e \$100,000. O le fesili i lau Afioga i le Taitaifono pe aisea tonu le mafuaaga ua aumai ai nei faasalaga tetele faapenei i le tatou Tulafono Tau Faaofi.

Ma le faaaloalo lava.

FOFOGA FETALAI: Malo, o lea ua maua le finagalo o le sui usufono, tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Faafetai lava i lau Afioga i le Fofoga Fetalai, faafetai foi i le sui usufono mo le fesili matagofie ma le taua. O le mea muamua e pei ona e faafesiligia le umi o le taimi talu ai ao lea faatoa oo mai ma faatalanoaina lenei Tulafono Tau Faaofi i le Palemene. E i ai lava tuatuagia e le gata o tulaga tau avanoa i totonu o le tatou potu fonu e mafai ai ona faatino fuafuaga a Komiti taitasi, ae le gata i lea o sailiiliga ina ia atoatoa ma ia faamaoni sailiiliga ma iloiloga a Komiti taitasi ma ia foi mai ai nei Lipoti ua atoatoa ona tali atu e tusa ai o lau faafesili i lenei itula.

22 *APERILA 2015*

**Tulafono Tau Faaofi o Taumafa 2013
- iloiloga auilili**

O lona lua o fesili, a e tagai ane, o le mea muamua e pei ona e fesili i le tetele o faasalaga. O le Tulafono Tau Faaofi lenei e agai i le soifua maloloina o le tagata ma le soifua o le tagata ina ia faalautele ma ia soifua umi le tagata i lenei olaga. O le mea e manatu ai le Tulafono Tau Faaofi, ia aua nei faatamala e o lo o latou tapenapenaina meaai taumafa aua le fofoga taumafa o le atunuu, o le ala tonu lena. A e tagai i ai i le Tulafono Tau Faaofi i lona Fuaiupu 2, o le mea lena ua toe sui mai ai le Fuaiupu 6(2), ina ia ogatasi ma Tulafono ma faasalaga o lo o faataatia mai i le Fuaiupu 5(2). Ou te talitonu ua faamalieina le finagalo o le sui usufono i le tali atu.

Tofa LEALAILEPULE RIMONI AIAFI: Lau Afioga i le Fofoga Fetalaií ..

FOFOGA FETALAI: Malie se i avatu muamua le avanoa i le Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai, sei ou faafesili atu lava. Ona o tatou ua fulisia i mea foi nei o le cater, a fai ni aiga tetele po o le aiga o le tatou Tutoatasi e ono oo i le 1,000 tagata, e aumai ai la tapenaga o taumafa ia, ae afai e i ai se faaletonu o le kuka, e feoti uma le Palemene atoa lenei o le a auai ma le toaape o i latou o le a auai e omai mai fafo. Ua lava lea sala? Matua laititi tele lenei sala.

Tofa LEALAILEPULE RIMONI AIAFI: Lau Afioga i le Fofoga Fetalai, ia manatua foi o le Afioga i le Palemia o le tagata ua maua lona tusi pasi faafomai i mea tau tulafono, Doctor of Laws. Ia manatua la a tatou talanoa loa, o lona uiga o le agaga foi lea e fai ai. Lau Afioga i le Taitaifono, o le uiga o lau faamatalaga, afai la ua tele le sala tupe e \$100,000, e tataua la ona atagia, e reflect mai i le prison term. O lona uiga, e leai se Samoa tailo i ai, afai e lima tausaga lou faasalaga pe \$100,000 lau sala tupe, e sili ai ona e alu e te falepuipui i le lima tausaga pe na o se lua tausaga e toe magalo, aua e leai se isi e mafai ona ia totogia se i vagana se kamupani tele, ae faigata ona oo i ai. O le uiga o lau faamatalaga lau Afioga, e leai ni consistent, aua e tataua ona fai fuafua le isi Tulafono i le isi Tulafono, aua o Tulafono uma lava a le Malo e auga tasi lava i le ola saogalemu ma le soifua maloloina o tagata.

Ma le faaaloalo lava.

FOFOGA FETALAI: Malo. E manatu lau Afioga i le Taitaifono o lea ua sagatonu lau saunoaga, ua manino ma malamalama lelei, malie foi le sui usufono o lea ua faaalua lou finagalo o lou alofa i le caterer ina ne i te i ane ua tele lana sala, ae ia utagia foi e le caterer ia aua ne i i ai se mea faaletonu.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

O le manatu lea o le Taitaifono ma le Komiti. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, leai ou te fia tuliloa lava le mataupu lea e te saunoa i ai o le alofa i caterers. O le alofa tonu lava lena e matua leaga tele. Afai la e faasala i se tamai sala faapea, e ono toe fai lava foi e se isi le mea lava lea, aemaise pe afai o lo o i ai ni tagata se toalua pe toatolu o lea e target e se isi o le aufaigaluega. O aso nei e faigofie lava ona tuu i ai sina tamai menti lava i totonu o le meaai ae alu atoa lava le malo ma i latou uma lava o i ai i totonu, aemaise lava i latou nei aivale, e avatu loa le meaai ai loa. Ia, e le afaina la tagata foi ia e tuai ona aai aua o le faiga a le tama lena, na ona pigi lava o oe e uma ai i ina, se i vagana la le vaega lea e ono aivale, e ono lavevea ai. O le ala lena lea sa ou fesili atu ai, matua outou alolofa tele, matua laitiiti tele lena sala.

Afioga Hon PALUSALUE FAAPO II (Taitai o le Itu Agai): Lau Afioga i le Fofoga Fetalai o se mea e fia faamalamalama.

FOFOGA FETALAI: Faamalamalama i le Taitaifono po o le Palemia?

Afioga Hon PALUSALUE FAAPO II: O laua uma lava.

FOFOGA FETALAI: Agai i le Taitaifono lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga, o mea uma ia sa saunoa i ai le Palemia, e le taitai tupu. O le mea lea e laga atu e le Itu lena, mo faasalaga le fuafua lelei. E taugata mo le aufai faleaiga, ioe. Ma e le... A o le mea lea e saunoa i ai le Palemia e faapea e feoti uma ai...

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga se i ou toe faasaoa lava le saunoaga a le Taitai Komiti, aua ou te agai lava au i le Taitai Komiti. Ou te le fia solitulafono i lou tu fua ou faalavelave i le faauilavea a le isi. O lau la faasaoga i le Taitaifono, o mea ia ua tutupu, atonu e le i tupu i Samoa a ua tutupu i fafo. Ma e i ai foi le mea lea e tataua ona tatou faaeteete i ai, ua sau le poto lea mai fafo, o le poto lelei atoa ma le poto leaga lea ua sau mai fafo, aemaise o lea ua amata lava ona toatele latou o lo o solitulafono i fafo ma tipoti mai e faamasino i fafo e toe foi mai Samoa, lea e mafua ai ona faatu le tatou faalapotopotoga foi lea e fesoasoani i ai le Malo i le toe taumafaiga ina ia toe fesoasoani ia i latou nei. Ae i ai lava le taimi e crack ai se tagata faapea e sau, aemaise lava ia i latou ua aoaoina i ituaiga metotia faaletonu faapenei faasolitulafono.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Lau Afioga i le Fofoga Fetalai, ou te faafetai i le Matagaluega a le Falemai i le latou aumaiga o le Tulafono Tau Faaofi lenei, leaga o lea e agai pea i luma le soifuaga, ma o le soifuaga lea tatou te i ai, o lea e sau lava le poto mai fafo, e le gata e aumai e tagata, a o lea foi e sau i internet, e faigofie lava ona e suesue i mea leaga esese uma e mafai ona e faaaogaina e faaoo ai le ita i se isi. Ae a sau la le toatasi lena po o le toalua lena e saofai i totonu o le saofaiga o se tausamiga tele, o le tagata ia e manao e faataunuu le Tulafono, e le taitai lava popole i le toatele lea e i ai. Na pau lava le mea, o le toatasi po o le toalua lea e agai i ai.

FOFOGA FETALAI: Malo faafetai i lau Afioga i le Palemia. Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, talu ai ona o lo o tulai mai pea ni faafesili ma ni faasaoga i le Tulafono, e lua lava nai mea ia e fia faaopoopo atu ai e tusa ai ma le saunoaga matagofie ma le faamanino atili o le Tulafono e le Afioga i le Palemia, o le saunoaga lea e faapea a le Taitai o le Itu Agai e le taitai ona tupu, o lena ua saunoa atu le Afioga i le Palemia. Ae le gata i lea, o le Tulafono lea o le Tulafono a le Soifua Maloloina. O le mau a le Matagaluega o le Soifua Maloloina, *“Prevention is better than cure.”* Lea e base ai lava le Tulafono lenei.

Lona lua, e leai se tau e ave i se soifua e afaina ona o le faatamala o le tapenaga o meataumafa. Faafetai.

Faamaonia le Teuteuga.

Faamaonia le Fuaiupu 6 e pei ona Teuteuina.

FUAIUPU 7: Faamatalaga sese o taumafa.

FOFOGA FETALAI: O lo o i ai le Teuteuga i le Fuaiupu 7 e pei ona faaalua i le Pepa Faaopoopo o Galuega. Tulai mai le Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Teuteuga i le Fuaiupu 7 e faapea:-

22 APERILA 2015

**Tulafono Tau Faaofi o Taumafa 2013
- iloiloga auiliili**

“TEUTEUGA:

(i) Fuaiupu 7(3):

Ia aveese le fuainumera “5000” ma suia i le fuainumera “8,000”, ma suia le fuainumera “lua (2)” i le “tolu (3)” ma faitauina ai le (3) e faapea:

“(3) O se tagata, o ia lea ua na solia le faafuaiupu (1), ua na faia se soligatulafono ma e noatia i luga o se moliaga ua faamaonia faaetulafono i se sala tupe e le silia le 8,000 iunite tau faasalaga po o le nofosala i le falepuipui mo se vaitaimi e le silia le tolu (3) tausaga, po o ia faasalaga uma e lua.”

(ii) Fuaiupu 7(4):

Ia aveese le fuainumera “8000” ma suia i le “5,000” ma aveese le fuainumera “tolu (3)” ma suia i le fuainumera “lua (2)” ma faitauina ai le (4) e faapea:

“(4) O se tagata, o ia lea ua na solia le faafuaiupu (1), ua na faia se soligatulafono ma e noatia i luga o se moliaga ua faamaonia faaetulafono i se sala tupe e le silia le 5,000 iunite tau faasalaga po o le nofosala i le falepuipui mo se vaitaimi e le silia le lua (2) tausaga, po o ia faasalaga uma e lua.”

FOFOGA FETALAI: Malo. Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Ia, o lea la o le a toe avatu lau fesili lau Afioga i le Tamaitai Minisita. O lea ua saunoa mai le Palemia ave i ai le lagolago talafeagai o le sala, a o lea ua toe tuu i lalo e le vaega lea le sala.

O fea la o i ai le femoumouai lea e i ai le Komiti? O le a le mea ua le tamau ai i sala na aumai i le Tulafono, o lea e fai mai e tuu i luga isi ina ia consistent, a o lea ua toe omai toe tuu i lalo faasalaga ua toe tuu mai i le 10 agai lalo ma le 8 tuu ifo i lalo. O le a tonu lava la le sao o nei mea lau Afioga?

FOFOGA FETALAI: Lau Afioga i le Taitaifono, se i tuu atu le avanoa i le Palemia.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai lava au ou te faamalo i le Komiti ona o le tulaga foi lele o lo o latou apoina foi le mau tauave o le uta a le potu e fetalai. E manaia lava le fetalai lea e faatinoina ai a outou faasalaga.

FOFOGA FETALAI: Malo. Ia tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Lau Afioga i le Fofoga Fetalai, ona o au o le sui usufono o le Komiti, o lea se i ou faamalamalama atu i le vaega lea le mafuaaga.

FOFOGA FETALAI: Ia se i fesoasoani ifo i le le malamalama o le sui usufono mo Faleata Sisifo.

Tofa AVEAU TUALA LEPALE NIKO PALAMO: A outou tagai i le Tulafono tele lenei, o le autu o le Tulafono e le o alu i tagata taitoatasi, o lea e alu i kamupani tetele ia e aumaia oloa mai fafo. Mo se faataitaiga, a aumai la se eleni foi lele, se uta eleni e faaletonu, o i e fua i ai, aua e afford e kamupani ia le 80,000. O isi sala ia e i i, e oo lava i le miliona, aua e tatau. O lea foi la e fua, a sese le labelling o mea ia e aumai, e le o fua foi lele a sese sau kuka ona e tago lea e label, leai, o le Tulafono e le o au i se tagata se toatasi lena, o lea e fua agai kamupani o lea e aumaia meaai i totonu o le atunuu. Ma le faaaloalo lava.

FOFOGA FETALAI: Malie lava lau Afioga i le Taitai o le Itu Agai, o lea faaiu mai le sui usufono lea na saunoa muamua.

Tofa LEALAILEPULE RIMONI AIAFI: Faafetai atu lava i le sui usufono mamalu o le Komiti. O lea e le i oo i le vaega 11, o le vaega lea e faapitoa mo tagata e aumaia oloa mai fafo. O le vaega la lea, e matua talafeagai ai loa le sala, a o le taimi lea o lea e faagasolo mai, o lea e alu agai i... a le o faleaiga iinei, o tagata taitoatasi, o mea faapena. O le ala la lena. A o le mea la lea na ou fesili atu ai lea e avatu ai lau fesili i le Afioga i le Taitaifono, ae o lea ua tali mai le Afioga i le Palemia, a o lea ou te agai i le Taitaifono.

Ae pau o le mea na ona faaali atu, ae ia, thank you Speaker.

FOFOGA FETALAI: Ave ia lou faatuatuaga i lou uso a sui o le Komiti o lea ua faamalamalama e aafia ai ma kamupani tetele ia e aumaia oloa mai fafo. Tulai mai lau Afioga i le Taitai o le Itu Agai.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Afioga Hon PALUSALUE FAAPO II: Lau Afioga i le Fofoga Fetalai, e ave lau faamalo ma le faafetai i sui o le Komiti, o lea faatoa malamalama lelei le Maota i le faamalamalama a le sui usufono o lenei Itu i totonu o le Komiti. O le ala lea o le tele o matou fesili o le matou le malamalama, e fai o le Afioga i le Palemia, a o lau Afioga i le Taitaifono. Ma lou faaaloalo lava.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, masalo ai sa e misa ma lou toalua e usu mai ai i le taeao nei, aua o le manaia ia o le manino o le faamalamalama lea e aumai, ae pei na o oe lava lea e te le malamalama.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, faamolemole ona o lo o i ai le saunoaga a le Afioga i le Taitai o le Itu Agai. E leai ou te fia faailoa atu, o le agaga lea i le matou Komiti, o le felagolagomai ma le galulue faatasi e aunoa ma se faaituau. Faafetai.

FOFOGA FETALAI: Ia, aua e te popole fua, e faapea lava le tala a le Itu Agai pe a sao le mea e tasi i i. Tafua e te fia saunoa ae se i tuu atu le avanoa i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai, na o sina mea laitiiti lava lea e fia faamalamalama o lea e fesiligia e le sui usufono mo Faleata Sisifo, i le eseese o sala. Silasila foi o le Fuaiupu 5, o taumafa lea e faasino i taumafa, a o le Fuaiupu 7, e faasino i faamatalaga sese. E eseese la mea ia e lua, tusa o faamatalaga sese ma taumafa o lea e tupu ai le gasegase. E tatau ona eseese sala ia. Ma le faaaloalo lava.

Tofa LEALAILEPULE RIMONI AIAFI: Lau Afioga i le Fofoga Fetalai, pei o le a umi ea. A e toe faitau i le Fuaiupu 10, lena e sau ai foi i ina le faatosina, faasalalauina o..... O lena foi la ua toe foi i luga i le \$10,000 le tatou sala.

FOFOGA FETALAI: Malie le sui usufono mo Faleata Sisifo ua maea ou avanoa.

Faamaonia le Teuteuga.

Faamaonia le Fuaiupu 7 e pei ona Teuteuina.

22 APERILA 2015

**Tulafono Tau Faaofi o Taumafa 2013
- iloiloga auiliili**

FUAIUPU 8: Manaoga mo le tusiaina o igoa.

Faamaonia.

FUAIUPU 9: Aso e muta ia le aoga ma le aso e muta ai lona lelei mo le taumafaina.

Faamaonia.

FUAIUPU 10: Taumafa mo tamaiti ma fanau iti.

Faamaonia.

FUAIUPU 11: Faaulufale mai ma le auina atu i fafo o taumafa.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: O le a le Fuaiupu?

Tofa LEALAILEPULE RIMONI AIAFI: Fuaiupu 11 lau Afioga.

FOFOGA FETALAI: Saunoa le sui usufono mo Faleata Sisifo.

Tofa LEALAILEPULE RIMONI AIAFI: E momoli atu le faafetai tele i le Komiti i le faatumauina o le faasalaga aua o lea la ua tatou agai i fafo i kamupani tetele e tai miliona pusa eleni ma... O le fesili la i lau Afioga i le Tamaitai Taitaifono o le Komiti, o le a se tou suesuega ma se fesiligia a le Matagaluega i le mau pusa eleni lea ua i Samoa e faapea o pusa eleni e fai ai faalavelave. O lona uiga a fai faalavelave e le taumafa? Ae le gata i lea, o pusa eleni foi nei recycle, o lea ua toe aumai avatu i fale foi nei faatau ese mai fale foi nei e fai ai faalavelave. Ae le gata i lena, o pisupo, lea sa tatou fiafia e taumafa ma ai manaia, ua matua le talafeagai nei mea ua lau mai.

Lau Afioga pe lavea ai i faasalaga nei? Ma le faaaloalo lava.

FOFOGA FETALAI: Tulai mai lau Afioga i le Taitaifono.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Afioga Hon GATOLOAIFAANA AMATAGA ALESANA GIDLOW: Faafetai lau Afioga i le Fofoga Fetalai, faafetai foi i le sui usufono i le mataala i le matagofie o fesili e atili faamalamalama ai foi le Tulafono ma sailiiliga a le Komiti. Ae ua e saunoa i eleni ia eseese ua oo mai i le tatou atunuu, o fesili tonu lava na sa fesiligia ai le aufai oloa foi o lo o latou aumaia ia oloa i totonu, po o a ia eleni e tau o eleni fai faalavelave, o a ia eleni o eleni taumafa? A o le latou faamatalaga ua aumai e faapea, e eseese ia le mackerel ma le herring, ia e faapena tau e eseese tau, e taugofie la le eleni herring i lo le mackerel, afai foi la i le fauga ma le faiga, e faapena la ona eseese o latou tau, ae o le saogalemu lava mo le fofoga taumafa o tagata, o lo o i ai pea le saogalemu ma le lelei. Ia o se tali atu lena lau Afioga i le Fofoga Fetalai.

Faamaonia le Fuaiupu 11.

FUAIUPU 12: Asiasiga o taumafa e faaulufale mai.

Faamaonia.

FUAIUPU 13: Tusi faamaonia tau le soifua maloloina.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Lau Afioga i le Fofoga Fetalai ..

FOFOGA FETALAI: O le a le Fuaiupu le sui usufono mo Aana Alofi Nu. 3?

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Lau Afioga i le Fofoga Fetalai o le Fuaiupu 13.

FOFOGA FETALAI: Saunoa le sui usufono, Tusi faamaonia tau le soifua maloloina.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa. E avea foi lena avanoa e avatu ai foi moomooga alofa ma le faamalo i le Afioga i le sui usufono mamalu mo le itumalo o Sagaga le Usoga, malo tauivi, faafetai foi i le paia o le afioaga ua molimauina le faatautoina i lena taeao, ia manuia lou sagai ane aua lou feagai ai ma le tofi o le itumalo.

Lau Afioga i le Fofoga Fetalai, pei o le auga o se fesili pei o le vaega tonu lea, part 3, food business, o le tele o le faamatalaga o vaega foi ia o pisinisi, ina ia faia lelei ia le tapenaina o le fofoga taumafa.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Peitai ane pei foi ona saunoa le Taitai o le Malo atonu foi o le tele o faatasiga a aiga ma fonotaga a nuu, po o i ai se vaega o le Tulafono e mafai ona fesoasoani ai i le gaseseina ma le puipuia lelei o vaega ia, aua e i ai nisi o faalavelave po o vaega o taumafataga e fai i afioaga, e cater, e faigofie la o lea e alu i ai food business, ae peitai ane o le tele lava o tatou vaega faapea o faatino i totonu o aiga ma nuu, o lea e gasese e alo foi ma fanau o se aiga po o le malosi foi o le nuu. Ae ona e vaai atu e le o i ai se vaega o le Tulafono e mafai ona fesoasoani ai i le faaleleia o le gaseseina o nei vaega, aua e talitonu lava o le tasi lenei vaega e ao ona silasila i ai le Tulafono, ona e tele i latou e mafai ona afaina mai ai i ni mai, faafetai.

FOFOGA FETALAI: Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Faafetai lau Afioga i le Fofoga Fetalai. O tulaga uma lava ua tagai i ai le Tulafono ina ia mafai ona puipuia aemaise lava nai vaega ia pei ona saunoa, tagata ia ua i ai o latou laisene e fai ai gasesega faapea, ae o tulaga pei ona saunoa ai ma faafesili ai le sui usufono mamalu, o lo o i ai foi ia Tulafono Faatonutonu mulimuli mai, e tagatagai i ai ina ia aafia lea vaega o lo o faapopolevaleina ai le sui usufono mamalu, faafetai.

FOFOGA FETALAI: Malo faafetai.

Faamaonia le Fuaiupu 13.

FUAIUPU 14: Tagata e faagaioia pisinisi tau taumafa.

Faamaonia.

FOFOGA FETALAI: Ia o le a avatu le avanoa i le Sui Taitai, tulai mai le sui usufono mo Falealupo.

Afioga Hon AEAU PENIAMINA LEAVAISEETA (Falealupo): Lau Afioga i le Fofoga Fetalai e taua tele le vaega lea i le faaleoina e le Komiti lenei, o au le Sui Taitaifono. O le fautuaga na ave mo latou ia i kamupani tetele, o le aveai a le Komiti lenei, o lea ua outou faafofoga i ai i eleni fai faalavelave ma le eleni e le fai faalavelave. Sa ave lava le faasea a le Komiti, e sese la ia mea.

22 APERILA 2015

**Tulafono Tau Faaofi o Taumafa 2013
- iloiloga auiliili**

O le vaai a le Komiti, silasila foi so o se eleni lava e taunuu mai iinei, e taumafaina lava e le atunuu, e sese la, o le fautuaga la a le Komiti, aua la ne i toe oo mai le mea leaí ..faapea o le eleni fai faalavelave ona taugofie lea, e sili ona faamauina o le fautuaga lena a le Komiti leaga e taua, a o le mea lea ua tupu nei i kamupani e sese, ona o le tele o tatou faalavelave ia ma talosaga foi a tagata, e i ai si lave siaí ..o le galuega lena a le Komitií ..

FOFOGA FETALAI: Malo. Ia le sui usufono mo Aana Alofi Nu. 3.

Afioga TOEOLLESULUSULU CEDRIC POSE SALESA SCHUSTER:
E faafetai atu lava i le Afioga i le Taitaifono o le Komiti i le faamalalamaina o lea vaega. Ona ou te le o malamalama tonu po o le a le vaega tonu o le Tulafono Faatonutonu e mafai ona faatino ai pe afai e le o faailoa mai i totonu o le Tulafono Autu le tatau ona faia ni training, po o se vaega e mafai ona fesoasoani ai aemaise lava pei ona avatu se tuualalo i vaega ia e le o faapisinisi ae mo tausiga o aiga aemaise foi afioaga ma alaafaga, e le gata i lea a o ekalesia i mea e feagai ai ma tatou uma, faafetai.

FOFOGA FETALAI: Malo. E manatu ua faamauina e le Taitaifono leí .Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai, o tulaga pei la a fai se papakiu a se ekalesia, e tatau ona i ai le laisene, o lea ua i ai i totonu o le tatou Tulafono. O isi la tapenaga i tua atu, o le a i ai i totonu o tatou Tulafono Faatonutonu.

FOFOGA FETALAI: Malo faafetai.

FUAIUPU 15: **Ia faamautinoa e tagata e faagaioioia pisinisi tau taumafa le mafai ona sailiilia taumafa.**

Faamaonia.

FUAIUPU 16: **Tagata e taulimaina taumafa.**

Faamaonia.

FUAIUPU 17: **Matafaioi a le Matagaluega.**

Faamaonia.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

FUAIUPU 18: Komiti o Faiga Faavae o Taumafa ma Meaai Paleni.

FOFOGA FETALAI: O lo o i ai le Teuteuga a le Komiti i le fuaiupu 18(1) e pei ona faaalua i le Pepa Faaopoopo o galuega. Tulai mai lau Afioga i le Taitaifono o le Komiti.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Teuteuga i le Fuaiupu 18(1) e faapea:

“TEUTEUGA:

Ia aveese le parakalafa “(g) tuai” ae faaofi le “(g) fou” e faapea:-

“(g) o se sui mai le Matagaluega o Aoga, Taaloga ma Aganuu.”

Faafetai lava.

Tofa LEALAILEPULE RIMONI AIAFI: Lau Afioga i le Fofoga Fetalai ..

FOFOGA FETALAI: Ia tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: Faafetai. O le tasi lea vaega taua o le Tulafono, faafetai tele i le Matagaluega i a latou faamalositino lea e alu atu pea i le Televisi ma le kukaina o meaai taumafa, e aoga tele polokalame ia mo le tatou atunuu. A o le Komiti la lea o meaai taumafa ma meaai paleni, faafetai i le Taitaifono o le Komiti ua tuu i ai ma le Matagaluega o Aoga, ae ou te talitonu e le tatau ona aveeseina le (g) lea e i ai nei, o le (g) lea e i ai, o se sui o le Faalapotopotoga foi ia o le atunuu o lea e nafa ma le faatinoina o taumafa pe afai o lea, ae sa tatau ona aveese le (h), aua o lea na ou tau fesili atu ai, po o le a tonu lea mea lea ituaiga sui, o se sui o se faalapotopotoga o le vaega tumaoti e nafa ma tagata e faaogaina taumafa, e tau o tagata o le au aai, vaeane lava lau Afioga, sa tatau la ou te le o iloa tonu po o i ai se faalapotopotoga faapea o i ai, faalapotopotoga a le au aai, vaeane lau Afioga, a o lea e i ai le faalapotopotoga a i latou e kukaina meaai le au caterers, e tatau ona include, e tatau ona i ai pea, ae faaopoopo sui o le Matagaluega o Aoga pei ona fautuaina e lau Afioga, ae se i faamalalalama la po o ai tonu lea e lavea ae tatau ona aveese, ma le faaloalo lava.

FOFOGA FETALAI: E faasao lou taimi lau Afioga i le Taitaifono. Le sui usufono mo Aana Alofi Nu. 3.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa. O nai fesili i le Fuaiupu 18 lea lau Afioga i le Fofoga Fetalai, ona o lea e faatulaga mai le Komiti o le sui o le Ofisa o le Soifua Maloloina, o le fesili faamolemole ona o le nutrition and food policy, e le o i ai i totonu i i se vaega o faamaoti mai ai, pei lava o lea ou te tau malamalama e i ai le nutrition vaega a le units po o le division a le falemai po o le NHS, po o le tagata lea e refer i ai pe ese se representative o le Ministry of Health, ae e leí í .o lona uiga la e le i ai la se chief nutritionist po o le tagata tonu o lo o feagai ma le faatinoina o lea Komiti.

O lona lua lau Afioga o le faafesili, pe le i se silasila a le Komiti pe ao ona i ai se isi o le NHS le vaaiga o falemai.

Ma le vaega lona tolu lau Afioga i le Fofoga Fetalai, e talitonu o le vaega b, ua leva ona le toe i ai le division lea o le vaomatua i lalo o le Agriculture. Lau Afioga e talosagaina le aveese mai i i ae faasao, o le Ministry of Agriculture and Fisheries, ae le o le Agriculture, Forestry and Fisheries, e aveese ai ona ua leva e le o toe i ai le Forestry i totonu o le Matagaluega lea, faafetai.

FOFOGA FETALAI: Ia tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Faafetai lava i faafesili a sui usufono mamalu lau Afioga i le Fofoga Fetalai.

O le fesili muamua lava a le Afioga i le sui usufono mo Faleata Sisifo, e sao lelei lava. Lau Afioga i le Fofoga Fetalai, ua le o i ai i faasaoga le tulaga lea o le g ona sosoo ai lea ma leí .o le g lea sa i ai o le a h, a o le h lea e i ai o le a i, o le isi vaega lena o le matou faasaoga sa ave ai ma le matou Teuteuga. Ae peitai o le faapuupuuga o se faamatalaga, e i ai pea ia representative lea o le private sector, e i ai pea foi ia le representative lea, body responsible for national food standards, ae faaopopo la i ai ma le Matagaluega o Aoga.

FOFOGA FETALAI: Se i tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e i ai le Faalapotopotoga e faaigoa o le Asocial for Consumer Protection, po o le Asosi a Latou o le Au Aai, e aofia foi la ma i latou uma e faataua ia isi oloa tai pei o taavale afi, e le faapea la o tagata e o atu e ai ni taavale afi, se i tulou, a o tagata e faaoga, faaogaina oloa e faatau mai e isi tagata, e aofia ai la le vaega lea o le au aai, lea e popole i ai ia le sui usufono mo Faleata Sisifo. Ae o lona uiga i le tusia o le Tulafono, o lea sa i ai le manatu lena ina ia aofia ai ma latou tonu ae faapitoa tonu lava i mea taumafa ona o le faaupuga o le Label Consumer Protection, e aofia uma ai lava tagata uma lava e latou te faatauina mai so o se oloa na o gasesega, e tataua la ona faamalosia le tulaga lea o le aumai o le oloa, po o a lava le oloa po o le taumafa po o se taavale afi po o le a lava, ia atoatoa ona lelei.

22 APERILA 2015

**Tulafono Tau Faaofi o Taumafa 2013
- iloiloga auilili**

FOFOGA FETALAI: Malie lau Afioga i le Taitaifono, i le faatulagaina o le faamaoniga o le Teuteuga sao e tatau ona i ai, e mafai ona e toe tolaulauina mai le faamaoniga ina ia maua ma tuu sao i lalo o le tatou Tulafono i lea mea e tatau ona i ai? Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: O le (g), o le faasaoga lea e i ai, ia aveese le parakarafa g tuai ae faaofi i le parakarafa g fou e faapea; g, o se sui mai se Matagaluega o Aoga, Taaloga ma Aganuu, ae soloi ane le g tuai i le h, ia soloi ane le h tuai i le i.

FOFOGA FETALAI: Mo le tausisia o le faamauina ina ia sagatonu le faauigaina o le Tulafono tusitusia e tatau ai ona faamauina.

Afioga Hon GATOLOAIFAANA AMATAGA ALESANA GIDLOW: Faafetai.

Faamaonia le Teuteuga.

FUAIUPU 19: Galuega tauave a le Komiti.

Faamaonia.

FUAIUPU 20: Tagata ofisa o le saogalemu o taumafa.

Faamaonia.

FUAIUPU 21: Malosiaga o le Faatonu Sili Aoa e tuuina atu ai faatonuga ma faiga e faafoe ai.

Faamaonia.

FUAIUPU 22: Faamatalaga aloaia.

Faamaonia.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

FUAIUPU 23: Faamaoniga.

Faamaonia.

FUAIUPU 24: Malosiaga e ulufale ma sueina ai nofoaga.

Faamaonia.

FUAIUPU 25: Poloaiga e tapunia ai.

Faamaonia.

FUAIUPU 26: Fesoasoani mai leoleo.

Faamaonia.

FUAIUPU 27: Vaega meaai faataitai.

Faamaonia.

FUAIUPU 28: Tofiaina o le tagata tomai faapitoa i suesuega auiliili ma le tusi faamaonia o le tagata tomai faapitoa i suesuega auiliili.

Tofa LEALAILEPULE RIMONI AIAFI: Lau Afioḡá í

FOFOGA FETALAI: O le a le Fuaiupu?

Tofa LEALAILEPULE RIMONI AIAFI: O le Fuaiupu 28 faamolemole.

FOFOGA FETALAI: Tulai mai le sui usufono mamalu.

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Tofa LEALAILEPULE RIMONI AIAFI: Lau Afioga e manatua foi o lea uma ona faavae e le tatou Malo le fale foi lea o le SROS, faapea o latou ia o lea e i ai le tomai faapitoa foi lea i le tele o vaega ia, pe sa le tataua la ona i ai se sui o lea vaega i totonu o lea Matagaluega i totonu o le Komiti lea i meaai, ma le tau toe sue mai foi o se isi tagata e vaai lea tulaga e mafai lava ona faatino i le vaega lea, ma le faaloalo lava.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, a tagai ane i le filifiliina lava o Food and Nutrition Policy Committee i le vaega 18, i le puipui 2, o lo o i ai le tulaga lena e mafai e le Afioga i le Minisita ona filifilia ni tagata e toatolu e faaopoopo i le Komiti lea o lo o i ai ia tomai faapitoa e fesoasoani ai i le Komiti lea, faafetai lava.

Faamaonia Fuaiupu 28.

FUAIUPU 29: Ata o le tusi faamaonia.

Faamaonia.

FUAIUPU 30: Aia tataua e talosagaina ai se suesuega lona lua.

Faamaonia.

FUAIUPU 31: Totogi o le suesuega auiliili.

Faamaonia.

FUAIUPU 32: Faoa faamalosia o taumafa po o mea e fesootai i ai.

FOFOGA FETALAI: O lo o i ai le Teuteuga. Tulai mai lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai ou te faatu le Teuteuga i le Fuaiupu 32 e faapea:

\

22 APERILA 2015

**Tulafono Tau Faaofi o Taumafa 2013
- iloiloga auilili**

ōTEUTEUGA:

Ia faaofi le faafuaiupu “(5) fou” i le tuanai ai o le faafuaiupu “(4)” e faapea:

“(5) O se poloaiga e tuuina atu e le Faamasino i lalo o le faafuaiupu 4, e mafai ona taua ai e faapea, o taumafa ua faamatuu atu po o se mea e fesootai i ai, e saogalemu.”

Faamaonia le Teuteuga.

Faamaonia le Fuaiupu 32 e pei ona Teuteuina.

FUAIUPU 33: Faatamaia ma le lafoaia o taumafa ua faoa faamalosi po o mea e fesootai i ai.

Faamaonia.

FUAIUPU 34: Soligatulafono e aafia ai le amio tau faasese.

Faamaonia.

FUAIUPU 35: Soligatulafono e aafia ai le faalavelaveina o tagata ofisa.

Faamaonia.

FUAIUPU 36: Soligatulafono e aafia ai le lomía faasalalau o faasalalauga faatosina e le o tausisia manaoga o le Tulafono.

Tofa LEALAILEPULE RIMONI AIAFI: Lau Afioga i le Fofoga Fetalaií ..

FOFOGA FETALAI: O le a le Fuaiupu?

22 *APERILA 2015*

**Tulafono Tau Faaofi o Taumafa 2013
- iloiloga auiliili**

Tofa LEALAILEPULE RIMONI AIAFI: O le Fuaiupu 36 lau Afioga.

FOFOGA FETALAI: Saunoa le sui usufono mamalu.

Tofa LEALAILEPULE RIMONI AIAFI: Sa faamamafa lava i le tatou Komiti foi lea o le SPAGHL ia mea ia o faatosina. Pe na tagai i ai lau Afioga i le Taitaifono ma fesiligia le Matagaluega. O le mea lea e i ai i le tatou TV, na o fagupia lava ma fagu suamalie i aso uma ma taimi uma, tuisi ma meaai e fiafia i ai tamaiti e le maua ai se soifua maloloina. Ua out of control. Faapefea la ia vaega? E i ai ni aiaiga o tou tuua i ai i faatosina ia faapea? Ae i ai foi la ni galuega o lo o faia o saunia e le Matagaluega e counter ai pe tetee ai i ia faasalalaua. Manaia a latou mea ia na faafetai ai i le amataga o lo o fai pea. Ae ua matauina i lenei vaitau, le malosi tele o le sau o faasalalaua nei ua tataua ona fai i ai se fuafuaga a le Matagaluega.

Ma le faaaloalo lava.

FOFOGA FETALAI: Lau Afioga i le Taitaifono.

Afioga Hon GATOLOAIFAANA AMATAGA ALESANA GIDLOW: Faafetai tele lau Afioga i le Fofoga Fetalai. Ma e faafetai atu foi i le sui usufono mamalu mo le faafesili aemaise foi le tuualalo. Ae o le agaga lava lena o lo o manaomia ai le vave ona pasia o lenei Tulafono, ia mafai na agai loa latou i Tulafono Faatonutonu, ia taofiofia ai ia popolega ma atugaluga e pei ona saunoa i ai le sui usufono mamalu. Faafetai lava.

Faamaonia le Fuaiupu 36.

FUAIUPU 37: Soligatulafono e aafia ai le foai atu o taumafa e le saogalemu.

Faamaonia.

FUAIUPU 38: Soligatulafono a faalapotopotoga ua tuu faatasia faaletulafono.

Faamaonia.

22 APERILA 2015

**Tulafono Tau Faaofi o Taumafa 2013
- iloiloga auilili**

FUAIUPU 39: Manatu taulagi ua avea ma faamatalaga molimau.

Faamaonia.

FUAIUPU 40: Poloaiga e totogi ai tupe faaaoga.

Famaonia.

FUAIUPU 41: Poloaiga e faamatuu atu ai ma lafoaia ai taumafa po o mea e fesootai i ai.

Faamaonia.

FUAIUPU 42: Poloaiga e taofia ai le faaaogaina o igoa ua tusia, ma isi tulaga faapena.

Faamaonia.

FUAIUPU 43: Poloaiga e taofia pe faasaina ai le tagofia o taumafa.

Faamaonia.

FUAIUPU 44: Puipuiga mai noataga tau le tagata lava ia.

Tofa LEALAILEPULE RIMONI AIAFI: Lau Afioga i le Fofoga Fetalai.

FOFOGA FETALAI: O le a le Fuaiupu?

Tofa LEALAILEPULE RIMONI AIAFI: O le Fuaiupu 44 lau Afioga.

FOFOGA FETALAI: Saunoa le sui usufono mamalu.

22 *APERILA 2015*

**Tulafono Tau Faaofi o Taumafa 2013
- iloiloga auilili**

Tofa LEALAILEPULE RIMONI AIAFI: O le Komiti lava lea e tasi Faa-Palemene o lea na aumaia le Tulafono lea na tatou pasia i le masina lea na tea nei o le Health Promotion Bill. O lea ua pasia le faavaeina ma le faatuina o le Matagaluega fou lea. Pe sa le tatau la ona aumai se teuteuga i tagata, aua ou te talitonu o le matafaioi tonu lea o le gafa ma lea, pe afai ma le Tulafono lenei, pe afai e sao au pe leai foi. Ae sa tatau la ona i ai i totonu i le vaega lea. Ma le faaaloalo lava.

Faamaonia le Fuaiupu 44.

FUAIUPU 45: Malosiaga tuuina atu.

Faamaonia.

FUAIUPU 46: Tulafono Faatonutonu.

Faamaonia.

FUAIUPU 47: Totogifuapauina ma pepa faatumu.

Faamaonia.

FUAIUPU 48: Faasinomaga i galuega aloaia ua faatulagaina.

Faamaonia.

FUAIUPU 49: Soloaiga.

Faamaonia.

FUAIUPU 50: Teuteuga faatupulaia.

Faamaonia.

2000

22 *APERILA 2015*

**Tulafono Tau Faaofi o le Fasimateina o Manu ma le Faasoatua o Aano
o Manufasi 2014 – iloiloga auiliili**

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Taumafa 2013.

FOFOGA FETALAI: O lo o i ai le Faasaoga a le Komiti. Tulai mai le Taitaifono.

Afioga Hon GATOLOAIFAANA AMATAGA ALESANA GIDLOW:
Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

*Ia aveese le fuainumera “2013” ma suia i le fuainumera “2015”
ma faitauina ai le Igoa o le Tulafono e faapea:*

TULAFONO O TAUMAFI 2015.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

*Na faagasolo le Tulafono Tau Faaofi o Taumafa 2015 faatasi ma Teuteuga
ma Faasaoga.*

**TULAFONO TAU FAAOFI O LE FASIMATEINA O MANU MA LE
FAASOA ATU O AANO O MANUFASI 2014 – iloiloga auiliili**

FOFOGA FETALAI: E tusa ai ma le Tulafono Tumau 106, e tataua ona faamaonia muamua e le Fono Aoa o le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono.

Tulai mai lau Afioga i le Taitaifono o Oloa Gaosia Tulaga Muamua, Mataupu tau Pisinisi, Alamanuia ma Leipa.

Afioga Hon LEAUPEPE TOLEAFOA APULU FAAFISI (Aana Alofi Nu. 1): Faafetai i lau Afioga i le Fofoga Fetalai. I le maea ai o le iloiloina o le Tulafono Tau Faaofi ma faaiugafonoina ai e le Komiti e fautuaina le Fono Aoa, *Ina ia faagasolo le Tulafono Tau Faaofi o le Fasimateina o Manu ma le Faasoatua o Aano o Manufasi 2014 faatasi ma Faasaoga.*

22 *APERILA 2015*

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

E le i tuuina atu le Fesili i le lafo.

FOFOGA FETALAI: E faasilasila atu ua faamaonia nei e le Fono Aoa le Lipoti a le Komiti o Oloa Gaosia Tulaga Muamua, Pisinisi Alamanuia ma Leipa i le Tulafono Tau Faaofi i le Fasimateina o Manu ma le Faasoa atu o Aano o Manufasi 2014.

O le a sagai atu loa le Fono Aoa mo le iloiloga auiliili o le Tulafono Tau Faaofi i le Fasimateina o Manu ma Faasoa atu o Aano o Manufasi 2015.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faamoemoega.

Faamaonia.

FUAIUPU 4: Faaaogaina.

Faamaonia.

FUAIUPU 5: Matafaioi a le Pulega Agavaa.

Faamaonia.

FUAIUPU 6: Tagata ofisa faatagaina.

Faamaonia.

FUAIUPU 7: Tiute tauave o tagata ofisa faatagaina.

Faamaonia.

22 *APERILA* 2015

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

FUAIUPU 8: Malosiaga o tagata ofisa faatagaina.

Faamaonia.

FUAIUPU 9: Malosiaga o le pueina faapagota.

Faamaonia.

FUAIUPU 10: Lipotia o solitulafono.

Faamaonia.

FUAIUPU 11: Komiti Faufautua o Aano Manufasi.

Tofa LEVAOPOLO TALATONU (Gagaemauga Nu. 2): Lau Afioga i le Fofoga Fetalai.

FOFOGA FETALAI: Tulai mai le sui usufono mamalu.

Tofa LEVAOPOLO TALATONU: Ou te faafesili atu lava i lau Afioga i le Taitaifono po o ua fai foi se Komiti faufautua a le fasimanu i le tulaga lea pe a? Pe ese foi lea mea? O le a le faamalamalama o le Komiti faufautua lea faamolemole.

FOFOGA FETALAI: Tulai mai lau Afioga i le Taitaifono.

Afioga Hon LEAUPEPE TOLEAFOA APULU FAAFISI: Manaia foi le faafesili a le sui usufono e faamalamalama ai le pitolaau lea. O i latou o e o lo o faapena ona faia tonu, mo le faatinoga o ...ina ia maua le siitia o aano o manufasi lelei. E fetuutuunai faapena.

Tofa LEVAOPOLO TALATONU: Faamolemole la lau Afioga pe i ai ni tomiai faapitoa o Komiti Faufautua ia aua o pei o na e mafuli lava i le faalagolago i le afaigaluega, ma tagata ia lava lo latou tomiai, ina ia tulai mai le Tulafono lea i se tulaga lelei. Ae a faapea o Komiti Faufautua foi ia e pei o komiti ia lea e faufautua ifo i o i le pito le la, o lona uiga la e pei e le talafeagai.

22 *APERILA 2015*

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

FOFOGA FETALAI: Tatou lafo ia le faatuatua i le Matagaluega. E leai lava se isi e nofo nofo saofai i se Komiti. E ala ona filifilia ona ua i ai tomai faapitoa i mea tau aano o manufasi.

Faamaonia le Fuaiupu 11.

FUAIUPU 12: Tuuina atu o malosiaga.

Faamaonia.

FUAIUPU 13: O nofoaga ma fale e faasimateina ai manu.

Faamaonia.

FUAIUPU 14: O tagata ua tuusaunoaina.

Faamaonia.

FUAIUPU 15: Faamaoniga o nofoaga laiseneina.

Tofa LEALAILEPULE RIMONI AIAFI: Lau Afioga i le Fofoga Fetalai.

FOFOGA FETALAI: Saunoa le sui usufono mamalu.

Tofa LEALAILEPULE RIMONI AIAFI: E muamua lau Afioga i le Taitaifono faamolemole. O fea ua fai i ai tatou taavale foi ia, mobile unit lea faapea e aumai e fasi ai tatou manu? Afai la o le a faaaogaina fale fasimanu, e i ai se tau faaopoopo mo le au fai lafumanu? A faapea la o lau manupapalagi vaeane le faafofogaaga a le atunuu, o lo o tau fasimateina i Safata, e i ai se isi e alu atu e supervise pe vaavaai le fasiina o le manupapalagi? O le a tonu lava le vaega lea i lau Afioga? O le a le tau faaopoopo pe afai e faia lea tulaga ua moomia e le Matagaluega, ae o feaí í . ua taunuu mai a tatou taavale ia sa taua e oo mai ae lei faatuina le fale lea? Ma le faaaloalo lava.

FOFOGA FETALAI: Tulai mai lau Afioga i le Taitaifono.

22 *APERILA 2015*

**Tulafono Tau Faaofi o le Fasimateina o Manu ma le Faasoaa atu o Aano
o Manufasi 2014 – iloiloga auiliili**

Afioga Hon LEAUPEPE TOLEAFOA APULU FAAFISI: Malo. E tasi foi lea fesili lelei. Ae ua ou manatu o lo o ua faapena ona tapena ma sauni e fua i le pasia o le Tulafono lenei. Ao le tulaga lea o le totogi, o le a fetuunai lava aua e faapena. Le alu atu o le taavale feaveai foi lenei i Upolu nei i Savaii, pasese i le vaa, ma o le a i ai foi faamamaavega, o le a faapena ona feagai ma le Matagaluega.

Tofa LEALAILEPULE RIMONI AIAFI: Manatua foi o le tele lava o manu papalagi ia e fasimateina nei i tua. E faamoemoe lava mo faalavelave o o tatou aiga ma taumafa ai lava i ina. O le a la le faiga o vaega ia. E faataga pea i lalo o le Tulafono, pe o le a taofiofi mamau, po o le a se aiaiga i ai?

Tofa AVEAU TUALA LEPALE NIKO PALAMO: Lau Afioga i le Fofoga Fetalaiif ..

FOFOGA FETALAI: Tulai mai le sui usufono.

Tofa AVEAU TUALA LEPALE NIKO PALAMO: Ona o au e i ai i le sui o le Komiti lea.

FOFOGA FETALAI: Se i fesoasoani atu i le Taitaifono.

Tofa AVEAU TUALA LEPALE NIKO PALAMO: O le Tulafono lenei, o lea e faatulafonoina ai le fasiina o manu, aemaise lava manu e faatau atu, for sale i le taumafa. O lea e saunoa isi, o lo o i ai foi le faamoemoe o le Tulafono lenei e faatino ai le vaega lea. Ona o lea e i ai le faamoemoe o le Matagaluega, e aumai ia mobile units, ia e saunoa ai, ae se i pasia le Tulafono ona faatino lea. O le mea la lea e faatino ai le vaega lea. E tatau la ona i ai sina tau foi lea. O lea foi e faamoemoe e tasi Savaii tasi Upolu. Ia ma le fale fasimanu, o lo o i ai foi le faatulagaina o le fale fasimanu, ia faafaigofie ai ona faatino le vaega lea e saunoa i ai le Afioga i le sui usufono.

FOFOGA FETALAI: Malo faafetai. O le a avatu le avanoa i le Afioga i le Minisita.

Afioga Hon LE MAMEA ROPATI: Faafetai i lau Afioga. Ou te tulai atu sei avatu sina faamalalamalama i nisi o mea ia e laga mai e Afioga i sui usufono. O tatou taavale ia o mobile units, e taunuu mai e lei uma le tausaga lenei. Silafia foi i le Fonotaga na uma atu nei, na ou manao lava ina ia vave aumai le Tulafono lea. Aua o la e faamoemoe le World Bank i le pasia o le Tulafono lea, ona faataunuu loa lea o mea ia.

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

O mobile units la ia po o fale fasimanu feaveai, e tasi mo Savaii tasi mo i inei. Ina ia faafaigofie ai aua e faigata ona o mai tua, o lea e fia fasi se latou manu, vaeane le paia, ae alu atu le taavale i ai, e alu atu ai foi ma le tagata e i ai lona tomai faapitua i le faiga o mea ia. E le faapea na ona alu o le taavale ona o ifo lea o tagata fasi a latou manu i o. E alu ai lava ma le tagata e alu e faasino i ai le faiga ina ia safe.

O le Tulafono lea na faatoa uma nei ona tatou pasia e ogatasi lelei lava ma le Tulafono Tau Faaofi lenei ua oo i ai. O i e vaai ai i le itu aua le saogalemu o manufasi aua le fofoga taumafa, ona pasi atu lea i faleoloa ma faatino ai le faiga o taumafa e i ai Tulafono uma nei e lua e manao le World Bank ina ia pasia, lea faatoa uma ona pasi atu le isi.

Ia faitau lelei lau Tulafono Tau Faaofi, o lona e i ai le mataupu lona na e fesili mulimuli mai ai nei. E le faapea o le a fai loa a tatou slaughter house ona faatino loa lea i le taimi nei, e pei ona silafia e tele nai faalavelave o tatou i tua e fai ma ave i ai, lea e i ai le faamoemoe e tolu tausaga ma tuu atu e faamasani ai le atunuu i le fale fasi manu ona faatoa faamamalu lelei lea o le tatou Tulafono Tau Faaofi, ae mo le taimi nei e pasia loa le Tulafono Tau Faaofi lenei ma aumai units nei ona amata loa lea ona faatino mo le taulaga ma faleoloa o lo o faataua ai aano o manufasi. E pei o le fesoasoani atu lea i le mataupu. Faafetai.

FOFOGA FETALAI: Malo faafetai, ua manino ma malamalama le folasaga a le Afioga i le Minisita aemaise foi o sui usufono o le Komiti, i le faatauaina mo le faafofogaaga a le atunuu leaga o lea faatoa fasia lenei o ni a tatou manupapalagi a o le auga ma le faamoemoe ia tumau le lelei o manupapalagi e faatauina atu, a o tatou lava faalavelave e fai lava i le mea e masani ai ae manaomia le malupuipua aua le saogalemu o taumafa. O le agaga lona o le Minisita ma le Matagaluega, e le tau fai atu o lona ua silafia le mea e fai. Ia le sui usufono mo Aana Alofi Nu. 3 o le a le mataupu?

Afioga TOELESULUSULU CEDRIC POSE SALESA SCHUSTER: Ia o le mataupu lava lea ona e matau atu o lo o tele lava ina faatalatalanoaina o manupapalagi peitai ane o le tele lava foi o meaituaolo o lo o faaaogaina e aiga i tua, aemaise foi o moa ma vaega uma eseese, aemaise lava lau Afioga o meaituaolo o lo o tele ina faaaogaina e aiga. Po o le a se fuafuaga a le tatou Matagaluega i le tatou Slaughter House lenei mo faalavelave aemaise o vaega e faaaogaina e afioaga ma alaafaga. Faafetai.

FOFOGA FETALAI: Se i tulai mai lau Afioga i le Minisita.

Afioga Hon LE MAMEA ROPATI: Silasila i le 18 lona e sau ai, o lona e lavea ai ma puaa, lavea ai foi ma mamoe, lavea ai foi ma moa ma pato atonu e alu alu foi lavea ai ma lupe i se isi taimi, ae amata lava i nai povi vae ane lava ma puaa faasolo ane ai i mamoe aua o lea o le a amata ona tele a tatou mamoe.

22 *APERILA 2015*

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

O au lea faatoa ou foi mai Ausetalia na ou alu ou vaavaai ai i le faiga lea, e matautia foi lea faiga o so o se manu lava e fasi ai atonu o se taimi ona tatou oo foi lea i le ituaiga mea lena ae mo le amataga e amata muamua i nai manupapalagi ma nai puaa ma faasolosolo atu ai. O le autu lava ina ia saogalemu taumafa mo le mamalu o le atunuu, ae le toe gasegase nisi. A toso ane lava se manupapalagi ua uma ona fasi i luga o le palapala ae vaai atu ua tai ai le sua a le toaina e matautia le mea e oo i ai faamai o lo o tutupu nei, aemaise o au o le fai vai, o le toatele o nai tagata e mamai ona o le le health o tatou meaai o lo o fai nei, a o lea ua i ai le tatou Tulafono ua faatuina e le Malo mo le lelei ma le agai i luma. O lau soso atu lea ma le agaga faaaloalo.

FUAIUPU 17: Asiasiga o nofoaga laiseneina.

Faamaonia.

FUAIUPU 18: Aofai o fale fasimanu ua faamaonia.

Tofa LEALAILPULE RIMONI AIAFI: Lau Afioga i le Fofoga Fetalai, o lau fesili tuusao i lau Afioga i le Minisita ona o lea ua manino i le Tulafono Tau Faaofi, ua fautuaina na o le tasi le Fale Fasimanu ma e fai i Upolu nei pe aisea ua le faia ai se Fale Fasimanu mo Savaii. Ae faafetai i lau Afioga leai o lea ua maua ona o lea sa faatali lau Afioga mo le pasiaina o lenei Tulafono Tau Faaofi lenei sa tatou talanoaina i le aso 18 Mati 2014. O le fesili tuusao lena i lau Afioga, pe aisea ua fai ai na o le Fale Fasimanu i Upolu? Ma le faaaloalo lava.

Afioga Hon LE MAMEA ROPATI: Ma le faaaloalo lava o lea ua i ai fuafuaga nei e pei ona ou taua e fai a tatou mobil units e tasi mo Savaii, tasi mo Upolu ae i ai le Fale Fasimanu mautu lelei lea e fuafua e fausia i Upolu e amata ai, a o lea e i ai a tatou mobile units e feoai ae faamautu uma mai i le tatou fale, aua e le taugofie ae alu alu lava ua vaai atu le Malo ma le Matagaluega ua tataua ona fai ma le fale fasimanu mautu i Savaii e faapena lava ona tatou agai i ai.

O le tali atu lea ma le faaaloalo lava.

FOFOGA FETALAI: Tulai mai le sui usufono mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai o le Fuaiupu 18 lava lea, faamolemole o le fesili i le Afioga i le Minisita ona o lo o i ai le tapenaga o lo o feagai ma le Matagaluega e pei ona i ai nisi o a tatou faamaumauga o le tele exports sa i ai i aso ma tausaga ma tuanai i le exporting o le meat i Amerika Samoa, atonu o le tasi lea vaega na taofia ai le tatou Slaughter House.

22 *APERILA 2015*

**Tulafono Tau Faaofi o le Fasimateina o Manu ma le Faasoatutu o Aano
o Manufasi 2014 – iloiloga auiliili**

E matauina foi i le faatalatalanoaina mai o nisi mai Tutuila e tele foi ni tapenapenaga e le gata o le Tulafono a o le approval a le USTA po o ai le vaega e manaomia le approval po o le certifying e le gata o le Slaughter House ao vaega e tatau ona tapena ae lei oo i le Slaughter House, po o i ai se tapenaga a le Matagaluega ina ia maea ane ma taunuu le Slaughter House a ua uma foi ona certify nei tei foi ua uma ona approval ae toe alu foi se isi tasi poo le lua tausaga o tatou faatali e mafai ona export ai Tutuila. Faafetai.

FOFOGA FETALAI: Tulai mai le Minisita.

Afioga Hon LE MAMEA ROPATI: Faafetai mo le faafesili, o le tulaga tonu lava lea ua faafaigata ai ona ave aano o manufasi i Tutuila aua o Tutuila e i lalo o puleaga faa-Amerika e manaomia le certification o manu ua uma ona fasi i se slaughter house. O le aoga tonu lena o le tatou fale lea o le a fai ina ia mafai ona ave a tatou manupapalagi e export atu i fafo e lavea ai ma Tutuila. A alu alu ua tele le povi e mafai lava foi ona export i Toga ma isi motu lata mai, ao le taimi nei o lo o tau build up lafu povi i le taimi nei ina ia mafai ai ona tatou oo i lea faamoemoe. O Vanuatu o lo o exports a latou povi poo manufasi, ua oo i Niu Sila, Ausetalia ma isi motu aupito ane ai. O le agaga lena o le Matagaluega ina ia i ai se taimi tatou te oo ane ai ao le taimi nei o lo o tatou concentrate ia tatou local mo i tatou lava i inei. E silafia e pei o Niu Sila ma isi atunuu o so o se manu lava ua uma ona fasi i se slaughter house e i ai le seal e stamp e faapipii i le tino o le manu pei o se certificate ma tau atu ai i le public o le manu lea ua saogalemu lelei mo taumafa. E faapena foi lo tatou faamoemoe, manatua foi o le mataupu lenei e taulamua ai le World Bank, aua latou te faia uma nei fuafuaga ina ia alu alu lava mo le taimi lenei ona tatou agai loa lea e export a tatou manupapalagi i fafo pea uma ona fasi. O lau soso atu lea ma le faaaloalo.

FOFOGA FETALAI: Tulai mai le sui usufono mo Faasaleleaga Nu. 4.

Afioga PESETA VAIFOU TEVAGA (Faasaleleaga Nu. 4): Lau Afioga i le Fofoga Fetalai, faafetai mo le avanoa, ina nei see ese le Afioga i le Minisita ma le mataupu lea e pei ona faafesili ai se tasi o sui usufono i le tasi o le Fale Fasimanu mo na o Upolu nei, ae silasila foi lau Afioga i le Minisita, e tatau foi ona i ai se Fale Fasimanu i Savaii, tatou te le ma iloa i le tala o le tau ma feoaiga a vaa, e i ai taimi e masani ona tutupu mea faapena e le mafai ai ona feoai vaa. Afai e vaiaso atoatoa o feagai tatou ma afa a o lea ua i ai manupapalagi i totonu o mobile unit nei, o le tulaga lena e manatu ai lou sui usufono ina ia silasila ane lau Afioga i le Minisita, e tatau lava ona fai se isi Fale Fasimanu e tua i ai le motu o Salafai aemaise o le tele o nei taumafa o le a faaleaogaina pe afai e i ai ni afa ma ni matagi malolosi ona le mafai lea e o tatou vaa ona feoai. Ma lou faaaloalo lava.

22 *APERILA 2015*

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

FOFOFOGA FETALAI: Tulai mai lau Afioga i le Sui Taitai o le Itu Agai.

Afioga Hon AEAU PENIAMINA LEAVASEETA: Lau Afioga i le Fofoga Fetalai ma le faaaloalo lava, o le laina lava lea e tasi e pei ona saunoa mai ai le sui usufono lea mai a matou i Savaii. Lau Afioga o le taimi lenei e tele foi a matou povi i Savaii, o le mea o lo o manao ai, lau Afioga i le Minisita manaia ia o ó aemaise lava ua oulua feiloai ma le World Bank. O le matou talosaga e faaupu faapea, a faapea ua tuai atu se matou Fale Fasimanu i Savaii leaga e i ai a matou povi e fia ave i Tutuila aemaise lava mea ia ua tutupu nei. O le matou talosaga e faapea, vaai au taavale ia e aumai, e mafai ona talosaga mai matou i Savaii ona alu atu lea lau uma mai matou povi i le fale fasi manu iinei? E faigofie lene ma pay e outou le alu atu o le taavale a? Ona tatou sikuea lea, leai o mea tuu sao mo le soifua maloloina lau Afioga, a ia faamalieina, tusa la pe tuai aua ua uma ona ou iloa e le iloa ni tausaga e fai ai lenei fale i o, a o le matou talosaga vaivai ia amanaia matou i le taimi lenei. A taunuu mai au taavale i le masina fou ma uma lo outou fale fasi manu iinei ia available mo Savaii ae totogi e outou taavale nei e lau mai ai matou povi ina ia tutusa tatou. Faafetai.

FOFOGA FETALAI: Malo.

Afioga Hon LE MAMEA ROPATI: O le mea lava lene e fai, a lea na ou fai atu e lua a tatou mobile units ia e i ai, o mobile units ia e i ai e le faapea e o atu e lau mai povi, e leai, e o atu e fasi povi ma tuu i totonu ma faatau, o le mea lene e tau o le mobile slaughter house a o le fale mautu lea ua uma ona ou fai atu e amata iinei ona e tele faleaiga, faletalimalo ma tagata o le taulaga e tu ai se mea tumau aua e le lava le supply a le mobile unit, a o lo tatou motu o Savaii e amatamata ai faapea. A alualu lava ae vaai atu loa le Matagaluega ma le Malo i lene taimi ua feataui lelei le tataua ona fausia se fale fasi manu i Savaii ma fau loa ae le faapea o le a faagalo atu lo tatou motu. O le fesoasoani atu lea ma lou faaaloalo lava faafetai.

Faamaonia le Fuaiupu 18.

FUAIUPU 19: O matafaioi a tagata e faagaioia.

Faamaonia.

22 *APERILA 2015*

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

**FUAIUPU 20: Ia fefaasoaai matafaioi a tagata e faagaoioia ma tuuina
atu nofoaga ma fale ma fesoasoani.**

Faamaonia.

FUAIUPU 21: Taofia le tumau ma le faaleaogaina o faamaoniga.

Faamaonia.

FUAIUPU 22: Faasilasilaga i le Pulega.

Faamaonia.

**FUAIUPU 23: Tumama lautele ma le faatonutonuina o lona
faagasologa.**

Faamaonia.

FUAIUPU 24: Tausia ma le mafai ona toe sailia o faamaumauga.

Faamaonia.

FUAIUPU 25: Fasimateina lelei ma le saogalemu o manu.

Faamaonia.

**FUAIUPU 26 O aiaiga mo le tagofiaina o po o le faatauina atu o aano
o manufasi.**

Faamaonia.

22 *APERILA 2015*

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

FUAIUPU 27: Asiasiga ma faailoga o tulaga maloloina.

Faamaonia.

FUAIUPU 28: O soligatulafono lautele.

Faamaonia.

FUAIUPU 29: O soligatulafono e faasaga i tagata ofisa faatagaina.

Faamaonia.

FUAIUPU 30: O le tuufaatasia o soligatulafono.

Faamaonia.

**FUAIUPU 31: Faaleaogaina o aano o manufasi ua le tausisia aiaiga o
le Tulafono.**

Faamaonia.

FUAIUPU 32: Tau o le faoa faamalosi ma le faatamaiaina.

Faamaonia.

FUAIUPU 33: Taii tau tupe e le totogiina.

Faamaonia.

2011

22 *APERILA* 2015

**Tulafono Tau Faaofi o le Fasimateina o Manu ma le Faasoa atu o Aano
o Manufasi 2014 – iloiloga auiliili**

FUAIUPU 34: Puipuiga mai noataga tau le tagata lava ia.

Faamaonia.

FUAIUPU 35: Pepa Faatumu.

Faamaonia.

FUAIUPU 36: Tulafono Faatonutonu.

Faamaonia.

FUAIUPU 37: Aiaiga tau soloaiga.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

**IGOA: Tulafono o le Fasimateina o Manu ma le Faasoa atu o
Aano o Manufasi 2014.**

FOFOGA FETALAI: O lo o i ai le Faasaoga i le Fuaiupu 1 ma le Igoa e
pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Afioga Hon LEAUPEPE TOLEAFOA APULU FAAFISI: Lau Afioga i
le Fofoga Fetalai ou te tulai atu ma le agaga faaaloalo e faatu le faasaoga i le
Fuaiupu 1 ma le Igoa e faapea:

“FAASAOGA:

*Ina ia aveese le fuainumera “2014” ma suia i le fuainumera “2015” ma
faitauina ai le Igoa o le Tulafono e faapea:*

**TULAFONO O LE FASIMATEINA O MANU MA LE
FAASOA ATU O AANO O MANUFASI 2015.”**

2012

22 APERILA 2015

Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 - iloiloga auiliili

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o le Fasimateina o Manu ma le Faasoa atu o Aano o Manufasi 2015 faatasi ma le Faasaoga.

FOFOGA FETALAI: Ou te manatu leaga o lea ua tatou tu lalata i le taimi malolo ona ou talitonu lea o le a vavae foe i lenei vaega o le taeao. O le a tatou alo i le tatou malologa masani ona tatou toe talii mai lea e faaauau le tatou Galuega e pei ona faatulagaina.

E valaaulia foi le paia ma le mamalu o le atunuu o tatou faatasi i lenei aso, tatou fai taumafaga ti faatasi, ma maua ai foi lenei e feiloai atu ai ma tatou militino faatasi aua le faamoemoe o le faatautoina o le sui usufono fou mo Sagaga le Usoga. O le a se fai fua ua maua e le tatou ofisa ia tatou ave lena i uta.

O le a faataatiaese Taualumaga o le Fono Aoao mo lana malologa masani o le taeao.

Na faataatiaese Taualumaga a le Fono Aoao mo lana malologa masani i le itula e 10:43 i le taeao ma toe amatalia i le itula e 11:21 i le taeao.

FOFOGA FETALAI: E momoli atu le faamalo ma le faafetai i le onosai mai o le tatou Maota mo le tatou Galuega i lenei vaega o le taeao. Ou te manatu o lea ua tatou taunuu i le vaega lona lua o le tatou Galuega faagasolo, malo le onosai, malo foi le faapalepale.

Ou te manatu ua maea ona pale auau le taliga o le sua ma fai le tautega aua le tatou faasiliga malosai. E faia le tatou malologa o lo o tatou i ai pea mo le Iloiloina ma pasiaina o Tulafono Tau Faaofi.

TULAFONO TAU FAAOFI O TEUTEUGA O LE TULAFONO O LE FAAPUTUGATUPE MO LE LUMANAI MANUIA O TAGATA 2014 - iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Taitaifono o le Komiti o Tupe Maua ma Tupe Totogi.

2013

22 *APERILA* 2015

Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 - iloiloga auiliili

Susuga Hon PAPALIHITELE NIKO LEE HANG (Palota Taitoatasi):
Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai, ina ia faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 faatasi ma Teuteuga ma Faasaoga.*

Faaluaina e le Sui Fofoga Fetalai, se tasi o sui usufono mo Faasaleleaga Nu, 1, Afioga Hon Gatoloaifaana Amataga Alesana Gidlow, sui usufono mo Sagaga le Usoga ma le sui usufono mo Aleipata Itupa i Lalo.

Na faamaonia le lafo.

FOFOGA FETALAI: Ou te faasilasila atu ua faamaonia nei e le Fono Aoa le Lipoti a le Komiti o Tupe Maua ma Tupe Totogi, i le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014.

O le a sagai atu loa le Fono Aoa mo le Iloiloga Auiliili o le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

FUAIUPU 2: Tagata Faigaluega o le Faaputugatupe.

Faamaonia.

FUAIUPU 3: Tusia o saofaga tau tupe i teugatupe.

Faamaonia.

FUAIUPU 4: Teugatupe a sui.

Faamaonia.

FUAIUPU 5: Fua faatatau o tului.

Faamaonia.

2014

22 APERILA 2015

Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 - iloiloga auilili

FUAIUPU 6: Faamaumauga tau maliu.

FOFOGA FETALAI: O lo o i ai le Teuteuga a le Komiti i le Fuaiupu 6 e pei ona faaalai i le Pepa Faaopoopo o Galuega.
Tulai mai lau Afioga i le Taitaifono o le Komiti.

Susuga Hon PAPALIITELE NIKO LEE HANG: Lau Afioga i le Fofoga Fetalai ou te faatu le Teuteuga i le Fuaiupu 6 e faapea:-

“TEUTEUGA:

Ia soloia le “Fuaiupu 6” o lo o i ai ma toe faanumera fuaiupu o lo o mulimuli maiö.

Faamaonia le Fuaiupu 6 e pei ona Teuteuina.

FUAIUPU 7: Toina i tua o saofaga tau tupe ma filifiliga i le aso e tatau ona maua ai se faamanuiaga.

Faamaonia.

FUAIUPU 8: Faaofiina o le aiaiga fou.

Faamaonia.

FUAIUPU 9: Aiaiga tau soloaiga

Faamaonia.

FUAIUPU 1 MA LE IGOA:

FUAIUPU 1 Igoa puupuu ma le amataga.

IGOA: Teuteuga o le Tulafono o le Faaputugatupe mo le Lumanai Manuia o Tagata.

FOFOGA FETALAI: O lo o i ai le Teuteuga a le Komiti i le fuaiupu 1 ma le Igoa e pei ona faaalai i le Pepa Faaopoopo o Galuega.
Tulai mai lau Afioga i le Taitaifono o le Komiti.

2015

22 *APERILA 2015*

Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 - iloiloga auiliili

Susuga Hon PAPALIITELE NIKO LEE HANG: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:-

“FAASAOGA:

Ia aveese le fuainumera “2014” ma suia i le fuainumera “2015” ma faitauina ai le Igoa o le Tulafono e faapea:

TEUTEUGA O LE TULAFONO O LE FAAPUTUGATUPE MO LE LUMANAI MANUIA O TAGATA 2015.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015 faatasi ma le Faasaoga.

TULAFONO TAU FAAOFI O TAUALUMAGA TAU SOLITULAFONO 2015 – faitauga faalua

FOFOGA FETALAI: Tulai mai lau Afioga i le Minisita mo Faamasinoga ma Pulega Tau Faamasinoga.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ona o lea e le o nofoia le Nofoa o le Minisita, pe mafai ona tatou see atu i le Tulafono Tau Faaofi o lo o sosoo ai.

TULAFONO TAU FAAOFI O LE FALETUPE TUTOTONU O SAMOA 2015 – faitauga faalua

FOFOGA FETALAI: Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faletupe Tutotonu o Samoa 2015 i lona faitauga faalua ma ou te fia tautala faamalamalama i ai.*

2016

22 APERILA 2015

**Tulafono Tau Faaofi o le Faletupe Tutotonu o Samoa 2015
– faitauga faalua**

Faaluaina e le Minisita mo Tupe Maua, Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le Tulafono Tau Faaofi o le Faletupe tutotonu o Samoa 2015, o le Tulafono Tau Faaofi ina ia faaauau ai le faavaeina o le Faletupe Tutotonu o Samoa, ma aiaia ai ma lona Pulega, o ana galuega tauave, tiute ma malosiaga. E pei ona silafia e le Faletupe lenei o le Faletupe e pulea uma lava gaoioiga a isi Faletupe i totonu o Samoa, e i ai le Faletupe o gaoioiga faapisinisi, o le ANZ, Westpac, Samoa Commercial Bank o Samoa ma le DBWS. O Faletupe uma nei lau Afioga i le Fofoga Fetalai o lo o i lalo o le puleaga a le tatou Faletupe Tutotonu. A silasila i le Tulafono Tau Faaofi o lea o le a soloia ai le Tulafono o le Faletupe Tutotonu o Samoa i le tausaga 1984, le Tulafono o le Teuina o Tupe i le Fale Teutupe o le 1960 ma le Tulafono o le Komiti Faatino a Samoa i Sisifo 1974.

A o le Tulafono lava ia na faatu aloaia ai le Faletupe Tutotonu na faia i le 1984 ae na tusia i le 1983. O le 1983 na faatoa faataoto ai le Tala o le Tupe ma faagaoioia atoa ai le Malo mai le tulaga pagatia sa i ai le atunuu. E le i leva ona uma atu le teva a le Malo i le tolu masina, e mafua lea teva ona ua le mafai ona faia se iuga a le Malo i le tagi a le afaigaluega mo sa latou siitaga ona o le faaletonu o le tulaga tau tupe. E le gata i le cash flow a le Malo lava ia, a ua matua leai lava ma se teugatupe faaagaga ma le tusia o oloa a le atunuu. O le ala foi lena sa matauina ai i lena taimi le gaogao ii o le tele o faleoloa i totonu o le atunuu, o le faiga lea na ó o le isi lea Teuteuga o Tulafono. Ou te manatua ina ua tulai mai le Faigamalo i lona tausaga muamua, na tilotilo ai le Malo i auala e toe faaleleia ai le tulaga tau tupe, e 23 Tulafono na toe Teuteu atoa i se taimi puupuu. Sa fesiligia ai le Matagaluega a le Loia Sili sa i ai i le taimi lea o le QC e igoa ia Crannog_mai Kanata po o le a le vave latou te tusia atoa ai Tulafono, ona na o nai vaiaso ona Fono lea o le Palemene. E sau le tali a Crannog o le tausaga atoa e toe tusia uma ai Tulafono e 23, e aofia ai ma Tulafono o Tiute ma vavae ai le tatou Tiute i vaega e lua o le Custom ma le Excise. O auala ia sa taumafai i ai le Malo i lena taimi e tau faaleleia lona tulaga tau tupe ma amata ai loa ona tapena foi le Tulafono lenei o le Faletupe Tutotonu, e oo mai i le taimi lea o galuega uma tau Faletupe Tutotonu sa faagaoioi mai totonu o le Matagaluega o Tupe.

O lea la na pasia ai loa le Tulafono Tau Faaofi lenei ina ia tau faatonutonu tatau ai tulaga o faiga faavae tau tupe a le tatou Malo, e le gata la i faiga faavae tau tupe, ae aafia ai foi ma faiga faavae i le tulaga o le faaoga tatauina o teugatupe e faaagaga mo fefaatauaiga.

**Tulafono Tau Faaofi o le Faletupe Tutotonu o Samoa 2015
– faitauga faalua**

E le gata i lea a o le faataoto foi o faiga faavae i le fesuiaiga o tupe po o le exchange adjustment na faataoto mai foi i le taimi tonu a lea ma faagasolo mai ai loa fuafuaga a le tatou Malo, e oo mai i le taimi lenei lea ua toe Teuteu atoa ai le Tulafono Tau Faaofi mai le taimi na i ai i le 1984 ma faagaoioi mai ai seia oo mai i le taimi lenei, lea ua toe aumai ai loa isi Teuteuga fou. O lea la ua suia atoa ai le Tulafono na i ai i le 1984, ao le agaga atoa lava o le lagolago lea i le faataoto o a tatou faiga faavae e faatumau ai le stability o le tatou Malo i ana fuafuaga tau tupe ó fiscal and monetary_policy_e aofia ai ma le faatulagaga o gaioioiga uma o Faletupe ma faatonutonu tatau ai le itu o le faatulagaina o tului, tupe teu faapea foi ma tupe nono. O i latou ia e faataatia mai le tulaga e faatonutonu ai gaioioiga o lo o fai e Faletupe atoa foi ma tupe faaagaga e tatau ona taofia i totonu e faaleleia atili ai tupe faavae ina ia aua nei oo atu i se tulaga foi lele e bankrupt ai le Faletupe ma oo atu ai foi le tatou tamaoiga i se tulaga faaletonu. E manatua foi o mea faapenei i atunuu tetele o le lalolagi e i ai ona reunifications e aofia uma ai le lalolagi. O le ala lena o lea e latou te faatonutonuina ai ia gaioioiga ia a o isi ia mafauauga na fanau mai i le tulaga faaletonu na oo i ai le tatou tamaoiga i le tausaga mai le tausaga 1979 i le 1982, ma o lea la e limataitaiina ai pea i tatou uma e oo foi i le faasalalauina ma le faalauiloa faalauaitetele o taualumaga o latou galuega ina ia silafia lautele e lo tatou atunuu ia faamatalaga tau tupe e silafia uma ai ia le gasologa o tatou galuega o lo o faatinoina nei, ia ma o le isi lea itutino o le Malo e fesootai pea ma Faalapotopotoga foi i fafo aemaise Faletupe o le Lalolagi ma le Faletupe o Asia ma Faaputugatupe Faava o Malo i taimi e asiasi mai ai ma latou faatalanoa ai le tulaga o i ai le tamaoiga mai i lea taimi i lea taimi. Pei ona silafia, le tele o galuega faapenei ua faatinoina ma o lea foi ua siitia maualuga ai lo tatou tamaoiga ua see ese mai le tulaga mativa sa i ai i le tulaga ua maualuga lona tamaoiga, a middle income level country, mai le tulaga sa i ai muamua amata mai lava ia Ianuari o le tausaga talu ai.

Lau Afioga i le Fofoga Fetalai, ia o Teuteuga na pei ona auiliili mai i totonu o le Tulafono lenei o le Faletupe Tutotonu o Samoa 1984 ua toe teuteuina nei i le Tulafono lenei.

FOFOGA FETALAI: Malo faafetai. E manatu ua faafofoga ma le manino lo tatou Maota i lenei foi Tulafono taua i le va faafeagai ai o le tatou Faletupe Tutotonu ia ma faafoga i le tulaga o le taumatimatiina i tulaga o lo o tatou i ai i lenei vaitau.

Tulai mai lau Afioga i le sui usufono mo Faleata Sasae.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai, faafetai foi i lau Afioga i le Palemia po o lau Afioga foi i le Minisita i le Tulafono, ua talia e lenei sui usufono le Tulafono Tau Faaofi. Ae i ai lava sina vaega lea o le Tulafono e ui lava ina sa faamalamalama foi e le Kovana, ae ou te manatu e tatau pea ona avatu ia lea vaega i lau Afioga i le Minisita.

2018

22 *APERILA* 2015

**Tulafono Tau Faaofi o le Faletupe Tutotonu o Samoa 2015
– faitauga faalua**

Lau Afioga i le Palemia o le vaega lea o le Tulafono lea e faapea mai ai i le filifiliga o le Komiti i le Sueina o Tusi, Audit Committee. I totonu o le Board of Directors o le Faalapotopotoga lenei po o le vaega foi lenei, e fa ia tagata ia e tau o Non Executive po o tagata foi ia e filifili mai i tua atu o le Pulega, a o le filifiliina la o le Komiti e Sueina Tusi, e le filifili mai i le vaega lea e toafa lea e i totonu o le Board. O lea la e ala ai ona ou fesili, ona o le tasi lenei Faalapotopotoga po o se vaega foi e ese le taua o latou matafaioi o le a faatino, ae o totonu foi o le Tulafono lenei o lo o faamalosi ai lava le Conflict of Interest, a o lea e foliga mai i le filifiliina o le Komiti Suesue lenei po o le Sueina o Tusi po o le Audit Committee lenei, o lea e tele lava le Conflict of Interest lea e i ai, ona o lea e filifili mai i sui e toafa o totonu o le Board. O lea ou teí ..na o se fautuaga, pe le mafai ona filifili mai le Audit Committee i fao atu o le Board, ona a tagai foi i ai i matafaioi a le Komiti lenei, e mafai e le Komiti lenei ona fautuaina aemaise lava le Audit Committee lenei, ona fautuaina e faamavae le Kovana i lalo o le fautuaga a le Komiti lenei agai i le Kapeneta i Le Ao o le Malo e mafai ai onaí ..e tele la le paoa o le Komiti lenei. O lea la e ala ai ona ou talosaga atu i le Afioga i le Minisita, pe le mafai ona toe tagai ane i le vaega lea, pe le tataua ona independent pea le Audit Committee lenei, independent mai aua ne i i lalo o le Board, aua ne i lalo o le Pulega, ae ia i ai lava le Komiti lenei aua o le Komiti lenei o lo o suesueina tusi, pei ona sausaunoa i ai le Afioga i le Palemia po o le Afioga i le Minisita, ma le faaaloalo lava.

FOFOGA FETALAI: Malo. Ua maua le finagalo o le sui usufono.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o le mea lea o le Audit Committee, e le o se mea ua leva ona talia aloaia e le lalolagi, masalo o lea ou te tau tomanatu nei pe a ma le 8 tausaga talu ai na compute ai le isi kamupani tele lava a Amerika, ae mafua mai lava i le tulaga foi lea o le faaletonu o latou Tausi Tusi, e oo foi i Tausi Tusi e mafai lava ona e le faapea e sao lava i taimi uma, ma o i ina la lea na tupu mai ai le mafaufauga i le tele o kamupani tetele e tataua ona faavae ni Audit Committee, ni Audit Committee i totonu lava o le Board. O latou ia o lea e malamalama e faafeagai ma le pule i taimi uma ma aumai faamatalaga ia latou, o lona uiga e tele lo latou iloa o le faagaoioiga o galuega, ma e ono malamalama ai foi i ni togafiti o lo o fai e le pule ma le latou foi Matagaluega, tasi lea faafitauli lea e tau fai foi ma tau maua i komiti ia, i le mea lava lea o tatou pei ua taufaavalevatea i lea mea o le Conflict of Interest, o le Conflict of Interest e mafai foi ona alu atu le tagata e matua lelei lava e leai se connection, ae o atu e sili atu lo latou fai mea faavalevatea.

2019

22 APERILA 2015

**Tulafono Tau Faaofi o le Faletupe Tutotonu o Samoa 2015
– faitauga faalua**

E faavae i luga o le ignorance o le mea la lena e i ai lava le faautautaga tatau tele lava lea e mafua ai ona fuafua le fautuaga lena, la e fuafua mai lava i totonu o tagata malamalama, ae le o mafai ona atoatoa lo latou malamalama leaga o lea e faalagolago i faamatalaga ia e aumai, ae le o mafai ona tilotilo i totonu o records. O le mea la lena e taua ai le manatu lea, tofi mai pea i totonu o le Komiti, ona o latou o lea e faafeagai pea ma le Pule o lo o talau atu ia faamatalaga, ae le o mailoa le sao atoatoa, o latou la ia e mafai ona loloto lo latou sailiiliga ia le tulaga e o e siaki fuainumera ia e aumai i i ma mea la e i totonu o faamaumauga. Ae a o atu tagata i fafo, o tagata e matua leai lava ma se malamalamaaga i mea la e fai, o i ina foi la e ono tuuitiitia ai le taua ona lilifa tele lea i le mea o le mataupu lea o le independence, ae le o maua atoatoa ai le agaga o le Tulafono.

FOFOGA FETALAI: Malo faafetai. Le sui usufono mo Gagaemauga Nu. 2, tuu atu pea le avanoa o lea ua tali le finagalóí ..

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalaií ..

FOFOGA FETALAI: Ia se i toe tulai maií ..

Afioga Toeolesulusulu Cedric Pose Salesa Schuster: O le uiga tonu lava o lou manatu lea e avatu, tusa o lea o le a toe audit lava e le Komiti lea le Board, lea o le a audit lava e le Board ia le Boardí ..

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Se i fai lava sina au faamatalaga. E le o audit ina e le Komiti le Board, o lea e audit e le Komiti lea le Management le Director ma lana afaigaluega. O le ala lena na ou fai atu ai, na o faamatalaga ia e aumai ae le o vaavaai latou i faamaumauga la e i tua atu o faamatalaga ia e aumai.

FOFOGA FETALAI: Ia le sui usufono mo Gagaemauga Nu. 2.

Tofa LEVAOPOLO TALATONU: Faafetai i lau Afioga i le Fofoga Fetalai mo le avanoa. Leai, e muamua ona avatu lau faafetai i le tulaga mataala foi o le Matagaluega aemaise lau Afioga i le Minisita mo Teuteuga nei mo le agai i luma o le tatou Faletupe.

Lau Afioga o lea ou te vaai atu lava i le lisi lea o sini autu o le Tulafono lena i ona Teuteuga, olaola e, se lisi, 1, 2, 3, 4, 5 toetiiti lava 10, tai pei o le mea lea o le Tulafono lea ma le Teuteuga lea, e aiaia ai mo Tupe Faaagaaga Faava o Malo e faatonutonu faaletulafono ai tupe, ia sau ai ma le sueina faasuetusi o galuega a le Faletupe. O lea la ou te fesili atu, po o le mea lea faatoa fai mea ia i i le Teuteuga lena, ae pe sa faapefea ona fai ia tulaga ia i le Tulafonóí í ?

2020

22 APERILA 2015

**Tulafono Tau Faaofi o le Faletupe Tutotonu o Samoa 2015
– faitauga faalua**

FOFOGA FETALAI: Malie le sui usufono.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e manatua foi a oo lona ina fai le Tulafono fou, e replace ai le Tulafono tuai, e le faapea o le a aveesea uma ai lava mea la e i ai i totonu, e aumai uma lava mea la e i le Tulafono tuai o lona e i ai le upu lona, -faaaauau,øpei lava e te le i mauaina a? -faaaauau,ø o le a le uiga o le upu faaaauau? O lona uiga o isi aiaiga lea e i ai e faaaauau pea. Ou te ofo ia te oe a o lea na faamatala lelei e i latou e ana le Tulafono i le tatou Maota nei. O lona uiga, e matuai e le malamalama lava i le lesona lelei sa fai, pe sa e auai pe leai?

Tofa LEVAOPOLO TALATONU: Faafetai i lau Afioga, leai sa ou auai, ae o le matuai ..pau lava le mea lea ua ou faafetai, ua fai faatulafono galuega ia sa faai í

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, afai la sa e auai ma e faafogafoga i le faamatalaga o ia mea, o lona uiga e matua le aoga so o se faamalamalama ia te oe? So o se faamalamalama, e te le fia malamalama lava.

Tofa LEVAOPOLO TALATONU: Lauí ..

FOFOGA FETALAI: Ua uma ou avanoa e lua.

Tofa LEVAOPOLO TALATONU: O lea e le i uma lata lauga faamolemole?

FOFOGA FETALAI: Ua maea avanoa e lua le sui usufono mo Gagaemauga Nu. 2.

Na faamaonia le lafo ma faitauina le Tulafono Tau Faaofi o le Faletupe Tutotonu o Samoa 2015 i lona faitauga faalua.

Tofa LEALAILEPULE RIMONI AIAFI: Lau Afioga o lea sa tutulai atu e fia fai nai manatu e fesoasoani i le tatou Tulafono?

FOFOGA FETALAI: Ia o le tatou faitauga faalua leni.

Tofa LEALAILEPULE RIMONI AIAFI: O lea la o le a alu?

FOFOGA FETALAI: O lea o le a alu i le Komiti ona foi mai foi laia, o le tatou mea masani.

2021

22 *APERILA 2015*

**Tulafono Tau Faaofi o Taualumaga Tau Solitulafono 2015
– faitauga faalua**

Tofa LEALAILEPULE RIMONI AIAFI: Lau Afioga, leai e puupuu lava sou manatu saí ..

FOFOGA FETALAI: Malilie sui usufono, o lea ua uma ona fai le tatou fesili le sui usufono mo Faleata Sisifo? Se alofa mai i le galuega a le Fofoga Fetalai o lea uaí ..e tele lo outou avanoa i le iloiloga auiliili, ia toe foi i le Komitií .

Tofa LEALAILEPULE RIMONI AIAFI: Lau Afioga i le Fofoga Fetalai, ia ou te ava tele i le va nonofo ai. Ae o le a ou molia oe i le Samoa Victim Support ua fai oe ma sasa ia au, ia ae tuuaia ia, faafetai.

FOFOGA FETALAI: Obey the orders. E tusa ai ma le Tulafono Tumau, o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloiloaina ma toe lipoti mai i le Fono Aoao i le isi tolu masina o lumanai.

**TULAFONO TAU FAAOFI O TAUALUMAGA TAU
SOLITULAFONO 2015 – faitauga faalua**

FOFOGA FETALAI: Tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon FIAME NAOMI MATAAFA (Minisita mo Famasinoga ma Pulega tau Faamasinoga): Lau Afioga i le Fofoga Fetalai ma mamalu o le Maota, e faatalofa atu i lenei itula o le aso o le tatou Fonotaga. E tulai atu ma le agaga faaaloalo fai sina faamatalaga o lenei Tulafono Tau Faaofi o Taualumaga tau Solitulafono 2015. E faafetai atu i lau Afioga ona o le toe fetuunaiga o le tatou Pepa o Galuega, ma atonu foi ua lelei lea e sosoo ai Tulafono o Mataupu tau Faamasinoga. A o le tatou Tulafono lenei lau Afioga i le Fofoga Fetalaií ..

FOFOGA FETALAI: Malie lau Afioga i le Tamaitai Minisita, se i faatu muamua le lafo ona fai ai lea o le saunoaga faamalamalama.

Afioga Hon FIAME NAOMI MATAAFA: Faafetai. Lau Afioga i le Fofoga Fetalai, ou te faatu le lafo, *Ina ia faitauina nei i lona faitauga faalua le Tulafono Tau Faaofi o Taualumaga tau Solitulafono 2015.*

Faaluaaina e le Minisita mo Galuega Tau Alamanuia ma Atinae a le Malo.

FOFOGA FETALAI: Tulai mai lau Afioga i le Minisita.

2022

22 *APERILA 2015*

**Tulafono Tau Faaofi o Taulumaga Tau Solitulafono 2015
– faitauga faalua**

Afioga Hon FIAME NAOMI MATAAFA: Lau Afioga o le tatou Tulafono leni o le a soloia ai ma suia le Tulafono o Faamasinoga Faaitumalo o le 1969, o le Tulafono o le a faaleleia ai tulaga faaneionapo le Tulafono Faamasinoga Faaitumalo lea o le 1969, e ala i le aveeseina o aiaiga tuai ua tausaga ma ua le o toe talafeagai le faaaogaina i nei aso ma le faafaigofieina o le gagana ua faaaogaina. Ua faapea foi ona faaoga faatulagana o le toefuataiga e fesootai ai i le Tulafono Faavae Malosiaga ma Taulumaga o Faamasinoga Faaitumalo a Samoa ma vaega o le Faamasinoga. Ma o nei suiga lau Afioga i le Fofoga Fetalai ua fuafuaina mo le faaleleia o le puleaina o Faamasinoga Faaitumalo ma faagasolo e faatatau i Taulumaga e fofogaina ma faia i ai faaiuga i totonu o Faamasinoga Faaitumalo.

Ia o se faamatalaga puupuu lea lau Afioga mo le silafia e le Maota.

FOFOGA FETALAI: Malo faafetai. Ia o avanoa mo a tatou felafolafoaiga, tulai mai lau Afioga i le sui usufono mo Gagaemauga Nu. 2.

Tofa LEVAOPOLO TALATONU: Lau Afioga i le Fofoga Fetalai faafetai mo le avanoa, e leai e puupuu lava foi se vaega e fia talanoa i ai. Masalo o le tulaga o le faagasologa ma le auaunaga a le Matagaluega, ia ua faafetai i galuega lelei o lo o faia. Na pau lava le atugaluga a lou sui usufono i i i tulaga o lo o i ai ia auaunaga a le Faamasinoga, ona ua tele nisi o meatotino foi ia ua faaletonu o le atunuu ona o mea nei o latou Faamasinoga Apili, masalo ua maliliu isi tagata sa faia le talosaga. O isi vaega ua tele ina autovaa mai o tatou tagata mai fafo i le faiga o talosaga apili nei, ae pei e foliga mai o lea e tele ai lava le faaletonu i totonu o le Matagaluega. E fesili atu pe ua i ai se fua e faaleleia ai le auaunaga lea. Ma le agaga faaaloalo lava.

Afioga Hon Fiamē Naomi Mataafa: Lau Afioga o se mea e toe fia faamanino, e pei o lea ou te faalogo atu e pei e agai le saunoaga a le sui usufono i le Faamasinoga o Fanua ma Suafa, a o le Faamasinoga faa-Itumalo lea tatou te talanoaina.

Tofa LEVAOPOLO TALATONU: O mea uma lava na lau Afioga.

FOFOGA FETALAI: Ua teletelevave lou finagalo ae tatou te le i oo i le Tulafono Tau Faaofi lea. E ui i lea, o le a faagafua.

Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Lau Afioga i le Fofoga Fetalai, e lelei lava le fesili sao pea i lau Afioga, ona e lua Tulafono Tau Faaofi lea e tuuina mai e le Tamaitai Minisita, o le Tulafono Tau Faaofi o Taulumaga Tau Soligatulafono ma le Tulafono Tau Faaofi o Faamasinoga Faaitumalo 2015. Po o le mea o le a fai faatasi loa po o le mea o lea ua tatou oo i lalo o le Faaitumalo?

2023

22 *APERILA 2015*

**Tulafono Tau Faaofi o Taulumaga Tau Solitulafono 2015
– faitauga faalua**

FOFOGA FETALAI: E leai, o lea tatou te i lalo o Taulumaga Tau Soligatulafono.

Tofa LEALAILEPULE RIMONI AIAFI: Lau Afioga i le Minisita, pei o le mea lena na talanoa atu ai ona o lea e pei ua saunoa mai le Tamaitai Minisita i le Tulafono Tau Faaofi mulimuli, ae afai o lea, tatou alu faatasi loa aua o le mea lava e tasi.

Tofa Levaopolo Talatonu: Lau Afioga o le ala tonu lea na avatu ai lau lauga i le mea lea, e ese le Tulafono Tau Faaofi ese le faamalamalamaga lea na aumai. Ae pei e sili ai loa le tatou alu faatasi, pe pasia ia ua lava lea.

FOFOGA FETALAI: Ia, o le a avatu le fesili.

Afioga Hon Palusalua Faapo II: E leai o le fia fesoasoani atu i le mataupu lau Afioga i le Fofoga Fetalai ona ua nunumi, o lea lava e nunumi atoa tatou mea e fai, ae lua Tulafono maioio e tatau ona agai i ai saunoaga a sui usufono ae le o le nunumi ai faapea ma faapea o le a pasia uma i le taimi e tasi.

Tofa LEALAILEPULE RIMONI AIAFI: Lau Afioga i le Fofoga Fetalai, o le a fai la se manatu i le Tulafono Tau Faaofi taua ua tuuina mai. Faafetai i lau Afioga i le Minisita e ese le matagofie o au Tulafono ua ave i ai le lagolago a lenei itumalo. E pei lava o le mea lea e faamamafa mai i le Tulafono lea o Taulumaga o Soligatulafono, atonu o se mea ua leva ona tatau ona aumai i le process i le faatinoga o galuega, aemaise lava i faamasinoga ona o lea e pei e tele ina telegese le faatinoina o faamasinoga, papuipui le tele o faamasino i le faiga o Tulafono ma le faatinoga o faamasinoga, ona o lea e i ai le manaoga i lalo o le Tulafono se iloga e i ai ni faatonu i nisi o solitulafono. O lea la ua aumai ai le teuteuga lenei e ave i ai le aiatatau i le Faamasino Sili e mafai ai ona fai toatasi e ia po o se Faamasino le faamasinoga e aunoa ai ma faatonu, se i vagana faasalaga mamafa lea e faasala ai i le soloatoa. O le vaega taua lea, ae o le vaega lea ou te fia í o le vaega o faatonu lau Afioga i le Tamaitai Minisita, ona i le toe aumaiga o le Tulafono i lau lea tilotilo, e tatau ona i ai ni nai tomai faapitoa foi nei, minimum qualification o nai tagata ia o le atunuu i lou talitonuga, ona e pei lava o lea ua tuu i faasalaga soloatoa. Pe le tatau ona i ai ni nai aiaiga faapitoa mo vaega ia, ona o lea e tuutalaloa le filifilia o i latou ae pe le i ai se aiaiga faapitoa faapena.

O le isi vaega lau Afioga, o le malosiaga lea ua ave i tagata taitoatasi, private people e mafai ai ona saisai mai e latou se tagata, arrest. O le taimi nei na o le Matagaluega lava o Leoleo lea e i ai le malosiaga lea, a o lea ua faataga mai lalo o le Tulafono Tau Faaofi lea ua aumai nei, le malosiaga o se tagata lautele na te molia ai so o se tagata ua na mautinoa ua soli le Tulafono.

Tulafono Tau Faaofi o Tualumaga Tau Solitulafono 2015
– faitauga faalua

Ae i ai la le vaega lena e sau i ina, a e saisaiina mai se tagata, ia mautinoa na o le tagata foi lea ua soli le Tulafono e faasalaina i le falepuipui i le tolu tausaga ma sili atu.

O le uiga la lena o lau faamatalaga, a ua faataga oe e saisai so o se tagata, so o se ituaiga solitulafono, aua e te le iloa foi po o lea tagata e te saisai maia, e molia i sea faasalaga faapea. O lou talitonuga, so o se tagata e soli le Tulafono, e tatau foi la ona i ai le malosiaga lea. Ae tatau foi la, pe le tei ua afaina ai le tagata lautele i le ave i ai o lea malosiaga, aua o lea ua tatala le avanoa, a alu atu le leoleo, e moni lava e i ai le mafaufauga foi lea o le tagata e tuu le mea la e fai ae sola ese. Ae a alu atu le tagata lautele foi lea pei o tatou, e faasaga mai le tagata toe fai ma ia i le ofe. E tatau ona tilotilo lelei i le aiaiga lea ua aumai, aemaise le soligatulafono. I le vaiaso nei, Aso Gafua na matua gaoia leaga ai le fale o lou brother in law, na talepe le fale ave uma mea i totonu. A o le gaoioiga lenei, e le i faia e se tagata se toatasi pe toalua, na ave i taavale, ave mea uma, TV, nofoa ma mea uma i totonu o le itula. O le mea lea na o atu lea o le Matagaluega a Leoleo, o le latou tala, e i ai pagota ia e i tua, e matua solitulafono mamafa, e le iloa po o fea o i ai. O le fesili la e fia avatu ai sou manatu, afai ua sosola nei pagota talepe fale ogaoga, ua leva ona tatau ona faalauiloa i le atunuu pei ona masani ai, aemaise i le vaimea lea e i ai matou i Faleata aua o lea e tau Vaitele, Vaitele, Vaitele, a o tagata nei ua leva ona tatau ona faalauiloa o latou suafa ma o latou foliga, ma nofo sauni ai foi nai tagata ia e i ai a latou meatotino i mea faapea.

O le isi vaega lau Afioga, o le Vaega 33 o le Tulafono, o le malosiaga lea o le Resitala ma le Faamasino e issue ai le mea foi lea o le faapoloaiga e sueina ai ma faoa faamalosi ai, pe o le mea o se mea lava ua leva ona sau ai, ae sa ou faapea na o Faamasino e i ai le aia lea, e i ai le malosiaga lea. Ao le faatinoina lava ia o le Tulafono ina ia faavavevave le faatinoga o faamasinoga, e ave i ai le lagolago a lenei sui usufono. Ma le faaaloalo lava. Faafetai.

FOFOGA FETALAI: Malo faafetai. Ia, o le a avatu muamua le avanoa Papalii, ona faaiu mai lea e le Afioga ia Levaopolo. Tulai mai le sui usufono mo Faasaleleaga Nu.2.

Susuga PAPALII LIO FAAVAIVAIOMANU TAEU MASIPAU (Faasaleleaga Nu. 2): Lau Afioga i le Fofoga Fetalai faapea foi le paia o le Maota, e fia faamauina foi le agaga faafetai i le Afioga i le Tamaitai Minisita mo lenei Tulafono Tau Faaofi. E talitonu foi ua au tausaga le Tulafono tuai sa i ai a o lea ua talafeagai lelei lava le tuuina mai o nei suiga ma tualumaga o tatou Faamasinoga i lenei vaitaimi. E fia avatu foi se tuualalo i tatou Faatonu, atonu o lea ua manaia le faataatiaina mai o le Tulafono i le taimi lenei o lea ua manino mai le tofiga o Faatonu i le lima tausaga i le Komisi o Faamasinoga. Ia, o lea foi ua i ai ma le 250 Faatonu e tatau ona i ai i ia tofiga. Ia te au lava ia ua manaia le tulaga lea ua i ai, ae na pau lava se tuualalo ina ia tofitofi mai i le tatou atunuu atoa, po o Savaii po o fea lava le nuu, o le taua foi ia o le mea lenei o le Faatonu.

Tulafono Tau Faaofi o Taulumaga Tau Solitulafono 2015
– faitauga faalua

E le o se agaga foi i se silafia tele o le Tulafono, a o le taua ia o le ofi mai o tatou tu ma aga faaleaganuu e fesoasoani foi i Alii Faamasino i a latou faaiuga. E taua tele le tulaga lea, e fia avatu ai se tuualalo i lau Afioga i le Tamaitai Minisita, e manaia lava le 250 lea ua faataoto mai i le tatou Tulafono, a ia tofitofi uma mai, po o Falealupo po o Aleipata po o fea, e lelei le tele o mafaufauga e omai i totonu o Faamasinoga, e lelei foi le lauiliuina o latou faaiuga. Aua o le mea moni lava lau Afioga i le Tamaitai Minisita, o le toatele ia o Faatonu ia vaeatu lava le Maota ma le faafofoga mai a le atunuu, o le tele lava o Faatonu o lo o nonofo iinei i le taulaga i totonu o umia saoloto, a o lo o i tua i afioaga i tua le tofa loloto lea e moomia i ituaiga faamasinoga faapenei, le tatou tu ma le agaifanua, aemaise o le tatou agaifanua ma le faa-Kerisiano. E pei o le agaga lena e avatu ai se tuualalo i lau Afioga i le Minisita, atonu o lea ua manaia le faataatia maiga o le Tulafono ae o le faagasologa, le process ma mea faapena lea e i ai se tuualalo, o lea foi e i ai le malosiaga o le Resitala i lalo o le Tulafono e review ai le lisi lea ia Ianuari i tausaga uma lava. Atonu o se avanoa taua foi lea e silasila totoa ai i le review ina o le lisi lea o Faatonu, ina ia aumai pea i latou o la e atoatoa le latou tu ma le agaifanua, aemaise foi o nai tama ma tina matutua e aoga tele i faamasinoga faapenei. E pei o se tuualalo lea i lau Afioga i le Tamaitai Minisita. Faafetai.

FOFOGA FETALAI: Malo faafetai tuualalo, faafetai fautua. Tulai mai Levaopolo.

Tofa LEVAOPOLO TALATONU: Faafetai i lau Afioga i le Fofoga Fetalai. O le Tulafono lava ia i lona vaega aoaotetele, o lea foi ua manaia i le tilotilo i tulaga uma. Na pau lava sina vaega lea e fia avatu ai se manatu lau Afioga i le Fofoga Fetalai, o le vaega lea o le pueina faapagota o tagata, lea e sau ai le vaega lea o le Tulafono e mafai ai e so o se tagata ona ia puea faapagota se isi tagata.

O lau fesili lau Afioga i le Minisita e tauala atu i le Fofoga Fetalai, po ua silasila lenei Matagaluega i le security po o le saogalemu o tagata i le vaega lea. O se faataitaiga afai e alu atu se isi ua i ai se isi ua gaioi i le fale, aua ne i galo, o tagata ia e o tapena lava i se faalavelave, o lona uiga e o lava ma auupega ma tulaga faapena. Afai la e alu atu ita lea e le i i ai sota tomiai, e pei o le tomiai la e i le Malu o le Malo, aua ua well train i mea nei o le approach ina o tagata faapenei. A alu atu la au lenei ou te le iloa fai se mea, o lona uiga ou te solomuli mai ai i le tagata lea e faatinoa le solitulafono.

O le vaega lena, e le auai lou manatu i le vaega lea o le Tulafono Tau Faaofi. Tuu pea le galuega i le Matagaluega a Leoleo ua lava lo latou tomiai i le faiga o mea ia. Faafetai mo le avanoa.

FOFOGA FETALAI: Malo. Tulai mai lau Afioga i le Minisita. Oi, ia malie lava o lo o i ai le isi sui usufono. Tulai mai Tafua ona faamaea ai lea. Tulai mai le sui usufono mo Aleipata Itupa I Lalo.

22 *APERILA 2015*

**Tulafono Tau Faaofi o Tualumaga Tau Solitulafono 2015
– faitauga faalua**

Afioga Tafua MALUELUE TAFUA (Aleipata Itupa i Lalo): Lau Afioga i le Fofoga Fetalai, ma le faaaloalo, o le vaega lea ua toalua sui usufono o le la Itu ua saunoa i le vaega lea o le citizens arrest, le mea lea faapea e pueina ai e so o se tagata ma arrest se tagata. Ua leva lava ona i ai le Tulafono lea i totonu o le tatou Tulafono Autu, e i ai lava le mea lea o le citizens arrest. O lona uiga a tau atu se tagata i se tagata ua solitulafono e i ai lava le aiatatau faa-sitiseni o tagata Samoa e mafai ai ona pueina le tagata lea. O le mea foi vaeatu, tulou le Maota, e faaoga i ai le commonsense po o le faautautaga tatau. E le faapea a vaai atu i le tagata pei o le lapoa o le sui usufono mo Gagaemauga Nu.2 ae soso i ai le tamai tagata pei o au, lona uiga na o le mea ta te solomuli ai. E fuafua la i ai le faautautaga tatau i le vaega lea. Ae afai o i ai sina au laau foi lea lua i le fa e faamoe ai, ia e ta lava vae aua le taina le ulu aua e toe molia ai oe e leoleo. Ma le faaaloalo.

FOFOGA FETALAI: O le isi vaega ma le faaaloalo, ia tulai mai le sui usufono mo Faleata Sisifo po o le a le mea lena e te fiaí ..

Tofa Lealailepule Rimoni Aiafi: Faafetai lava i lau Afioga i le Minisita. E sao lau Afioga i le vaega lea, ae pei o le mea lea ua toe faaopoopo mai i le Tulafono, se i vagana se solitulafono tolu tausaga pe sili atu. O le vaega la lena o lea e i ai le popolega i lou tagata, a ua aumai loa se faatagaga, faataga faasoloatoa aua e le iloa foi e ita pe fia ni tausaga e faasala ai se tagata. O le mea lena e tatala ai le avanoa aua pei o le puipuiga lena o tatou, aua e sao oe, o le assault la le mea e molia ai ita, aua e tatau lava ona ta i le lua i le fa.

FOFOGA FETALAI: Ia, e manumanu foi i tatou upu ma tala ia aua ne i avea le mea lea e faafofoga mai le atunuu, e talii foi ae popoe, e seu pea le manu ma tagai i le galu. O le agaga o le Tulafono o le malupuipua, ae fai foi o le puipua ae o le togafitia. Ne i meaane ua le sala le na faatinoa le faatinoga ae sala le o lo o taumafai e faatino ala o le Tulafono. Ae ona o lea e faafofoga le tatou atunuu, ia, aua le faia ia mea o lo o i ai pea nisi auala, e sili lava le palaai e ola umi, ae aua le faia ia tulaga ne i tei ua uma ane ua soli ai le Tulafono. Tulai mai le sui usufono mo Aleipata Itupa i Lalo.

Afioga TAFUA MALUELUE TAFUA: Lau Afioga i le Fofoga Fetalai, toe tasi si vaega lea e matau atu o lea e i le Tulafono Tau Faaofi, o le vaega lea faapea o le faailoaina atu po o le disclosure foi lea o faamatalaga a molimau, lea e i ai le vaega i lalo o le Tulafono e faatagaina ai le talosaga a le ua molia po o le Loia a le ua molia e aumai uma ai lisi a molimau. E tatau foi ona i ai le puipuiga i le vaega lea o nai molimau.aua afai e le malupuipua, masalo lava o la foi e i ai le faautautaga tatau a i latou i le faamasinoga, e le mafai ona tuuina atu ia vaega mo le ua molia. Ma le faaaloalo.

FOFOGA FETALAI: Tulai mai lau Afioga i le Minisita mo le tali faaii.

22 *APERILA 2015*

**Tulafono Tau Faaofi o Faamasinoga Faaitumalo 2015
– faitauga faalua**

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai. O le uiga lava lea o le faitauga faalua, o lo o i ai le felafolafoaiga e faaali ai finagalo ma taofi o sui usufono. Faafetai foi i le faamanino mai e nisi o o tatou sui usufono se tasi lea o mataupu i le citizen arrest, e sao lava o le vaega lava o le Tulafono ua leva ona i ai. O se mea foi e le na o Samoa e i ai, o le tele lava o puleaga faafaamasinoga faapenei o lo o i ai le avanoa lea. Lau Afioga mo faamaumauga a le tatou Fonotaga, o le tatou Tulafono lea ua tatou i ai nei i luga, o Tulafono Tau Faaofi o Taulumaga tau Solitulafono. Ma ou te faamalulu atu, o le faamalamalamaga e sao ai ia sui usufono na tulai mai, o le isi Tulafono lea e sosoo ai, ae tauaiga lava. Ae silasila ane ia outou pepa fonu, o lo o i ai faamalamalamaga atoa o le tatou Tulafono lea. Ae lau Afioga i le Fofoga Fetalai, o saunoaga ua faaalua, o fautuaga foi ma tuualalo, o lea e faagasolo le tatou mataupu i le tatou Komiti, atonu o le a faapena ona faalauiloa atili, ma tuliloa nisi o naunautaiga o lo o i ai i finagalo faaalua, ona toe foi mai foi lea o le tatou mataupu ma tatou talanoa ai auiliili i ai i le faitauga mulimuli.

Ma le faaloalo lava.

Na faamaonia le lafo ma faitauina le Tulafono Tau Faaofi o Taulumaga tau Solitulafono 2015 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi o Taulumaga tau Solitulafono 2015 i le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa mo le iloilo ina ma toe lipoti mai i le Fonu Aoa ia le silia le isi tolu masina o lumanai.

**TULAFONO TAU FAAOFI O FAAMASINO
FAAITUMALO 2015 – faitauga faalua**

FOFOGA FETALAI: Tulai mai lau Afioga i le Minisita.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faamasinoga Faaitumalo 2015 i lona faitauga faalua.*

Faalua e le Minisita mo Fesootaiga ma Faamatalaga Tekonolosi ma le Minisita mo Galuega Tau Alamanuia ma Atinae a le Malo.

Afioga Hon FIAME NAOMI MATAAFA: Lau Afioga ona o lea ua uma ona ou faamalamalamaina le Tulafono lea i le tatou Tulafono ua faasolo atu muamua. Pe ua lava lena faamatalaga ae fesiitai mai i faamaumauga a le tatou Fonotaga.

22 *APERILA 2015*

Lafu mo le Toe Suia o Itula Fono

FOFOGA FETALAI: E manatu ua ioeina e sui usufono mamalu. Ua manino ma faamalamalama lau Tulafono ua aiga ai Tulafono e lua. Ma ou te talitonu ua manino ma malamalama lelei ua tatau ona lafo i aao o le tatou Komiti. E avanoa foi le tatou Komiti mo nisi o faafesili e fia tuuina mai i tatou iloiloiga auiliili.

Na faamaonia le lafo ma faitauina le Tulafono Tau Faaofi o Faamasinoga Faaitumalo 2015.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o Mataupu Tau Faamasinoga, Leoleo ma Falepuipui ma Faamasinoga o Fanua ma Suafa i le toe iloiloia ma toe lipoti mai i le Fono Aoa, i le isi tolu masina o lumanai.

Ou te tapa lau Afioga i le Palemia mo le tatou lafo.

LAFO MO LE TOE SUIA O ITULA FONO

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia toe faafoi itula Fono i itula aiaia o le Tulafono Tumau 31(1).*

Faaluaina e le Afioga i le Sui Palemia, Minisita mo Galuega Tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.

Na faamaonia le lafo ma tulai ai itula Fono ua toe faafoi i itula masani e pei ona aiaia i le Tulafono Tumau 31(1).

FOFOGA FETALAI: Ou te manatu o lea ua tatou taunuu i le taunuuga o le tatou pepa o le galuega o lenei aso. E talitonu foi o lea ua sunui tau i le tini le galuega sa tatou faananau i ai ona o le faamaeaina o nisi o le tele o tatou Tulafono faanatinati ma Tulafono ina ia tuu atu loa i aao o tatou Komiti faapalemene aua le lau liliuina. I lou agaga faaaloalo, ou te momoli atu ai i lenei avanoa le faafetai tele, i le paia ma le mamalu o le tatou usugafono. Le afio o lau Afioga i le Palemia ma lau Kapeneta aemaise foi lau Afioga i le Taitai o le Itu Agai ma le sui taitai ma le paia ma le mamalu maualuga o le tatou Palemene o lenei aso. Malo fai o le faiva. Ua taunuu ma tini tau ao le tatou galuega, e pei ona tatou faananau i ai. Ua taunuu ai le tatou galuega i le manuia ma le alofa ma le agalelei o le Atua. Malo le usufono faafetai foi le faamalolosi mai i le tatou galuega i lenei masina.

E i ai lava le agaga ma le faamoemoe, o lo o i ai pea nisi o a tatou galuega tuua, e le gata i lipoti aemaise foi o taualumaga a Komiti faapalemene, ao lea foi ua toe faaopoopo atu nisi o a tatou galuega fou i lenei aso, e ala i Tulafono ua tuuina atu i aao o Komiti Faapalemene.

22 *APERILA 2015*

Lafu mo le Toe Suia o Itula Fono

E avatu ai pea le talosaga a le Fofoga Fetalai, ia outou alofagia, tulaga o le faasolosolo o le tatou galuega ina ia tuituli matagau pea le ufi a Sina, e ala i le faaauuina o le tatou galuega e ala i le tatou toe foi mai i le tatou Fonotaga ia Me, e faapena ona faaauau ai le tatou galuega e pei ona talosaga atu. E tatalo pea ma le agaga mauualalo e pei foi ona i ai le aso ananafi, i le taumafai atu i le faaauuina ina ia aua ne i i ai se toalia o nisi o a tatou Tulafono taua o Faiga Palota, aemaise o le tatou Tulafono o le faavae i lau Afioga i le Taitaifono ma la outou Komiti mamalu. E lafo atu ma le faatuatuga aloaia. O le faatuatuga a le Nofoa aemaise o le sui o le Palemene, ina ia tuuina mai nei Tulafono i le aso 26 Me o le a toe taunuu i ai le tatou Fonotaga.

E momoli foi le faafetai tele i lenei aso e tusa ai foi ma le tatou faatasiga ma le faafeiloaiga o le tatou sui usufono fou ia Seiuli. O lea ua uma ona fofola le fala ave foi le tatou timai ma le faamanuia ma le faamanatu ina ia maua le lagolagosua e ala i le tatou galuega faatasi. O le a i ai se taimi ona faatino lea o galuega e le Ofisa o le Fono. A i ai lava se mea e fia malamalama ai, o lo o avanoa le tulaga o le Failautusi ma le Ofisa e faatinoina ia tulaga. Faafetai atu i le tatou atunuu i lenei vaega o le aso. Samoa mai ona ao seia oo i ona iu, o lea ua iu galuega a lou Palemene sa tauavameaina i lenei vaiaso. Faamalo atu le onosai. Faamalo le tautua. Faamalo foi i le agaga o lo outou manatu i le tapuaiga, manuia alofaiva a lou Palemene ona o la outou tatalo leleoa.

E faamanatu foi i lo outou manatu i le tapuaiga. Manuia alofaiva a lou Palemene ona o la outou tatalo leleoa. Le Aufaigaluega Paia aua ne i faaitiitia faamanuiaga mai le lagi, aua la outou fatuaiga tausii, la outou tatalo faamanuia, la outou tatalo le leoa ina ia manuia taitai o le atunuu ma upufai o Malo. Faafetai atu foi i le paia ma le mamalu o faatumutumuga, Faaululuga o Matagaluega a le Malo o Faalapotopotoga, ia alo i outou faiva manaia. O outou mama na, maua la outou tofa ma la outou faautautaga, aemaise foi lo outou malosi i le tino ma le agaga ma le mafaufau, e faaauuina ai le tatou galuega e masani ai.

Ae e le i tuua le tatou Fonotaga ou te tatalo atu i lau Afioga le sui usufono mo Faleata Sisifo, e tulai mai e fai se tatou tatalo faamanuia ona tatou malolo ai lea.

Na tolopo Taulaumaga a le Fono Aoao i le itula e 12:17 i le aoauli, seia aulia le itula e 9:00 i le taeao o le Aso Lua, 26 Me 2015.